

## Pauro Homa ezektsa bo ziwatahaka

Pauro Homa ezektsa bo ziwatahaka asahi Sudeutsabyitsa iwatahi ispe niy:

— Taparaka Deus Abarão ziwatawy itsekokatsa humo kino niwatihi nisiwatawy, iwatsahi ityryktsa niyziknaha. Sudeutsa Abarão tsekokatsa. Tubabatu Deus taharere ty Moises bo nyny niy iwahahi ziwatahaka, iwaze Sudeutsa ana humo hi yhỹ ziknakaranaha. Taparaka Sudeutsa zuba Deus tyryktsa. Aiba eze zuba Deus meky watu niy, Sesus Kiristu iharapatawyhyta humo nihyrikosokda, mysapyzeken nihyrikosoda iwatahi Deus mysopyksapybyri humo mymyokzo. Abaka kytsa ihumo sispirikporëtsaktsa ityryktsa myziknaha. Taparaka Sudeutsa abaka Sudeutsabyitsa kino niwatihi ityryktsa myziknaha — niy. Homa ezektsa ana humo hi batu sihyrinymyry iwaze Deus Pauro ziapewywyky iwatahi ziwatahaka. Abaka katsa kino niwatihi Pauro wataha humo tanymyryky.

*Deus wasania ty myzubaha bo my.*

<sup>1</sup> O Homa ezektsa ahabo piwatahaka. Utakta Pauro. Sesus Kiristu tsumuëhïtsa Deus zikwatawy niy. Ata hi:

— O Pauro ikia apehata tsimy. Wasaniha ty nanabyitaba tynatsasokokta! — niy.

Hỹ iky.

<sup>2</sup> Tubabatu Deus sohotsa tihi:

— Deus wasania ty mybarawy ezektsa myzubaha bo mysipeha. Asaktsa Deus harere kytsa sizubarëtsa bo mykaranaha — nikaranaha. Ana kino botu ziwataha iharere papeu humo ziwataha. Iharere wasani my. Ana ty hi botu ziwataha abaka atsatu wasani mykara, Deus

wasania ty motsasokonaha. <sup>3</sup> Deus wasania ty tatse soho. Sesus Kiristu mypehakatsa. Atahi mybarawy bo inasik Dawi tsekokatsa niyzik. Deus tse mywata niyzik. <sup>4</sup> Deus hyrikoso ituk mynapykyryk. Atahi mybarawy bo inasikze atakta wasani haty ziknakara. Tsimysapyrêta ziknakara. Nihyrikosokda. Bykyze Deus zikwy humo inahyrizikpo. Ispitu niyzikzo. Ana humo hi kytsa sizubarêtsa:

— O atakta Deus tse babata. Iktsazubatahaktsa — niaha. <sup>5</sup> Ihumo Deus piksapywyky. Deus hi zikwatawy wasania ty iakzohota kytsa sizubarêtsa bo motsasoko ana humo hi zikpeha. Iwatsahi kytsa sizubarêtsa Sesus Kiristu harere piwabykynahaze hyỹ mykaranaha. Ihumo sispirikporêtsa moziknaha hỹ. <sup>6</sup> ikiahatsa Homa ezektsa kino niwatihi Deus tyryktsa tsimoziknaha. Ana kino Deus mozihikik.

<sup>7</sup> Iwaze ahabo piwatahaka, ikiahatsa Homa ezektsa. Deus ahahumo tsimypokzitsiarêta hỹ, ityryktsa tsimoziknaha anahi nizihikik. Deus myzo. Sesus Kiristu mypehakatsa. Utakta ahatsyhyryze ispe my:

— O Deus myzo Homa ezektsa tysisapywykykta! Sesus Kiristu humo sakurêtsa babatsa moziknaha hỹ — my. Iwa myhỹ.

*Pauro Sesus Kiristu humo ka tsakurêta* iwaze Deus bo Homa ezektsa tsyhyryze mopamykysoko.

<sup>8</sup> Iwaze myzubarêtsa ahasoho humo tihi:

— O Homa ezektsa Sesus harere bo hyỹ — mykaranaha. Ana humo hi piwabykyze kakurêta hỹ. Deus pe my:

— O Deus myzo ikia zuba tsamysapyrêta ikia Homa ezektsa botu tsiksitsumuẽhĩ iwatsahi ahumo sispirikporêtsa moziknaha — my. Iwa Deus pe my. <sup>9</sup> Pibiyituhukutu ahasoho bo mytsaty mykara. Ahatsyhyryze Deus bo mopamykysoikik. Deus zikwatawy iwatahi itsyhyryze tarabaja mykara. Nanabyitaba Deus wasania ty tatse soho motsasoko ana hi

kahyriziktsozawu. Uta ahahumo kamypokzitsiarêta iwatahi Deus bo mopamykysokoze hi:

<sup>10</sup> — O myzo Homa ezektsa bo mynakozore zeka kakurêta mykara. Tsipikpeha zeka sibo mynakozore! — my. <sup>11</sup> Ikiahatsa humo kahyrizikbarêta. Ahabo mynakozore tsihikik. Hawa Deus zikyrinymyryky atsa tu pahahyrinymyry tsihikik iwaze Sesus harere bo hyÿ tsimykaranaha hÿ. <sup>12</sup> Iwa uta hi pahakuwyky. Ikiahatsa kino niwatihi tsipikykuwykynaha. Katsaktsa Sesus harere bo hyÿ tsimykaranahaze tsimyharapekuwykynahaktsa.

<sup>13</sup> O katukytsa ahabo mynakozore tsihikikze batu zik, tsihokdaharêna iwatahi batu pão. Kytsa Sesus harere bo hyÿ mykaranaha ana humo hi mozihikik. Ahatukytsa Sesus humo sispirikporêtsa ana hi mozihikik iwatahi ahabo mynakozore tsihikik hÿ. Utsa kytsa Sudeutsabyitsa Sesus humo sispirikporêtsa ikiahatsa tuk Sesus harere bo hyÿ mykaranaha asa watsa hi mozihikik. <sup>14</sup> Deus myzubaha bo zikpeha. Iwaze bipyritsa bo mykara. Bipyritsabyitsa bo kino niwatihi. Utsa papeu humo sihyrinymyrêtsa bo mykara. Asaktsa papeu humo sinyhy byitsa bo mykara. Myzubaha bo mykara, sibo Deus wasania ty motsasokoro Deus zikyko tahi mykara. <sup>15</sup> Iwatahi Homa bo pomo tsihikikze tu, ahabo Deus harere motsaso tsihikik hÿ.

*Deus wasaniha humo mekywa tu tsimoziknaha.*

<sup>16</sup> Aty zeka Deus harere bo hyÿ mykara atakta Deus zikwy humo ityryk mozik Deus tuk mozuruku. Tapara Sudeutsa Sesus harere bo hyÿ nikaranahaze ityryktsa niyziknaha. Kyze Sudeutsabyitsa Sesus humo sispirikporêtsaze ityryktsa niyziknaha. Ana humo hi kakurêta. Iharere humo batu kasikpyby. <sup>17</sup> Deus wasania ty tsipiwabynahaze isoho humo myhyrinymyrêtsa. Hawa

kytsa simysapyrëtsa moziknaha ihumo tsipinymyrykynaha. Deus hi:

— Asa zuba Sesus harere bo hyÿ mykaranaha asahi kaokzeka wasani mykaranaha. Pibiyituhukutu Sesus harere bo ma mykaranaha — my. Deus harere papeu hi:

— Aty zeka Deus humo tsimysapyrëta mozik iwatahi pibiyituhukutu Sesus harere bo hyÿ mykara — niy.

*Kytsa sisopyksapybyitsa tu nikaranaha ana humo hi Deus taokaniki.*

<sup>18</sup> Deus ta bijoikpe eze tu my. Kytsa sisopyksapybyitsa tu nikaranaha humo Deus taokaniki. Atahi:

— Kaokzeka ikiahatsa batu ahasopyksapy — my. Kytsa Deus harere humo batu hÿ zikaha, ustsya kytsa mysisapybyikinaha. Kytsa Deus wasania ty motsasokonahaze ustsya kytsa mysiaknikinaha, kytsa Sesus bo hyÿ mykaranaha ihumo sispirikporëtsa moziknaha ana humo kino batu hÿ mykaranaha. Iwatsahi Deus okzeka batu sisopyksapy maha. <sup>19</sup> Hawa Deus mykara anatyhi mybarawy ezektsa bo botu nisihyrinymyry. Iwaze hawa Deus mykara kytsa mysihyrinymyrykynaha tsahi batu hÿ zikaha. Iwatsahi ihumo batu siakparawy. Iwatahi Deus mysisininiwyky.

<sup>20</sup> Katsa Deus ba zinyaha. Deus koikny bakta tu mybarawy nizukni. Nizukni naha bo iktsa tsimahaze. Katsa hi:

— O mybarawy suknitsa zikwykyta my. Atahi Deus babata — tsimykaranaha. Ustsya kytsa hawa Deus soho mytsaty mykaranaha batu taharere ty harapubeteheke nikaranaha. Ba ziktsaso:

— Hawa Deus mykara myhumo tsihokdaharëna — maha. Iwaha hi ba ziktsaso. <sup>21</sup> Hawa Deus mykara sihyrinymyrëtsa. Iwatsatu batu ipe niaha:

— O ikia zuba wasani tsimykara. Ikia zuba tsamysapyrëta — maha. Iwaha hi ba ziktsaso. Paikpa mytsaty

nikaranaha. Simytsatyhybyitsa tu kytsa watsa asahi miwaha buruk nizaranaha. <sup>22</sup> Tahapetu sisopyk:

— O katsaktsa myhyrinymyrëtsa — mytsaty ahabyitsa tu nikaranaha. Deus okzeka batu aty tohi sinymyryhy. <sup>23</sup> Deus zuba koikny baktatu my. Asaktsa Deus bo ba ziny-naha iwatsahi iharere bo batu yhỹ nikaranaha. Ihumo batu simyharerewaby batu iktsazuba zikaha. Iwaze asahi:

— Katsaktsa kytsa hyrikoso watsa tahasuknikinaha! Siraratsa hyrikoso tsawatsa nisisuknikinaha. Sisarakatsa hyrikoso tsawatsa nisisuknikinaha! Pyryhyktsa hyrikoso tsawatsa nisisuknikinaha. Deus myhyrikoso hyrity wa ta bo zuba — mytsaty nikaranaha. Asa kino siharerewabymybarëtsa iktsazuba sisopyk.

<sup>24</sup> Asaktsa sakmyrëtsa watsa nikaranaha iwaze simyapybyitsa zuba mozihikiknaha atsatu mynakaranaha. Iwatahi Deus nisierekek hawa mozihikiknaha astsa tu mykaranaha. Tyhapemyijaikiknaha, tyharapesapybyikiknaha. <sup>25</sup> Asaktsa Deus harere bo batu yhỹ zikaha. Wasaniha humo ka batu hỹ zikaha. Hawa ha ty batu mysapy ana humo ka hyỹ mykaranaha batu sispirikpo. Myspihikbatawy bo zuba yhỹ mykaranaha. Deus nizukni naha humo siakparawy nikaranaha. Deus babata batu siakparawy nikaranaha. Batu sispirikpo, ata bo hi katsa siakparawy tsimaha iharere bo ma tsimahaktsa! Iwa tsimaha. Ata hi tawahi mynapykyk iwatsahi katsa hi:

— O ikia zuba tsapunihikrëta. Ikia tsamysapyrëta — tsimaha. Iwa tsimaha hỹ.

<sup>26</sup> Iwatsahi asaktsa Deus humo simyharerewabybyitsa tu Deus nisierekek. Zimyi tsihikiknaha atsatu mykaranaha. Iwa Deus kytsa nisierekek. Wytykyryk tahabariktsa tuk batu hỹ zikaha asiza zuba tahawaky wytykyryk humo zuba ziknakaranaha. <sup>27</sup> Kytsa kino

niwatihi wytykyryk waza tahaokeza ba ziksipyryryknaha. Tahawakytza humo zuba mozihihikknaha ana humo hi batu sisopyksapy my. Ziknharape wowokonaha sisapybyitsa tu nikaranaha ana humo hi siakmyitsa niyziknaha. Deus hi nisisininiwyky, iharere bo zimyiwykynaha.

<sup>28</sup> Hawa ha ty Deus soho wasaniha bo hỹbyri nikaranaha, iwatsahi simysapybyitsa soho bo zuba mytsaty ziknakaranaha. Iwaze Deus nisierekek iwaze hawa nizihikknaha atsatu mynakaranaha.

<sup>29</sup> Iwatsahi wasanibyitsa mozurukunaha. Pibytuhukutu sisopyksapybyitsa mykaranaha. Utsa kytsa namy zuba mozihihikknaha. Taha bo zuba mytsaty sisopyk. Okyrysaro tsihitsa moziknaha. Myzokdiwy mynakaranaha.

Mysukyrywy. Simyspihikbatakatsa. Sisakimyijanikitsa. <sup>30</sup> Siharerewabymybarẽtsa. Deus humo tahakyrikinaha. Siharereziubyikitsa. Asahi:

— Katsa zuba myhyrinymyrẽtsa nikaranaha. Katsaktsa mymysapyrẽtsa — mytsaty ahabyitsa nikaranaha. Pibytuhukunaha tu tahapetu sisopyk:

— Hawa ha sa batu imysapy tsimaha — iwa mytsaty mynakaranaha. Tahazotsa harere bo batu yhỹ zikaha.

<sup>31</sup> Wasaniha baba humo batu sihyrinymyry tsihikbyitsa. Motsasokonahaze batu wasani zikaha. Utsa kytsa ty batu isty tsumuẽhĩ nymyryhỹ. Batu aty tohi humo ba zipokzitsi. <sup>32</sup> Deus hi:

— Asaktsa simysapybyitsa tu mynakaranaha sinini ykarawy bo mysipeha. Anaeze tahawahi mynapykyryknaha — my. Ana harere humo sihyrinymyrẽtsa. Iwatsa tu batu ma zikaha. Utsa kytsa mysimyiwykynahaze sihumo tahaydikknaha. Iwa my.

## 2

*Deus myzubarẽtsa huak ty sibo nyny my.*

<sup>1</sup> Kaharereziuwytša ikiahatsa ja. Sozeka ja ahatuk tsimypamykysonaha.

— Asaktsa Deus okzeka batu sisopyksapy mykaranaha. Katsaktsa batu siwatsa — tsimykaranaha. Ikiahatsa siwatsa hi tsimykaranaha iwaze ahaharere ty harapubeteheke tsimykaranaha. <sup>2</sup> Deus zuba wasani haty mynakara. Deus tihi:

— Aty imysapybara ty mykara zeka atakta sinini ykarawy bo pipehahik — my. Anaharere wasani my. <sup>3</sup> O kaharereziuwytša. Ahape tu ahasopyk zeka:

— Deus ustsä simysapybyikitsa tu nikaranaha humo mysininiwyky. Katsaktsa batu — mytsaty ahabyitsa tsikykaranaha. Ikiahatsa kino atsatu tsimykaranaha. Iki-ahatsa Deus harere humo ka ba zikwaknaha iwaze sinini tsimykaranaha! <sup>4</sup> Ikiahatsa Deus humo tsimysapybyrikinaha. Deus ahahumo tsiakubyrisorokrëta. Ahahumo tsimypokzitsiukrëta. Pahasapywyky. Ahamysapybara ty tsimoewynaha iwa mozhikik. Ahamysapybara ty ty-moewy ahabyizeka pahasininiwyky. Ikiahatsa hi:

— O mysapybyitsa tu tsimykaranaha Deus mybo ba zikmysininiwy — mybarapetu tsimykaranaha. <sup>5</sup> Iwatahi sihumo Deus taokaniki. Asaktsa simysapybyitsa tu mynakaranaha mysininiwyky. Hanawa puruze Deus simysapybyikitsa sinini ykarawy bo mysipehahik. Wasani my simysapybyitsa tu nikaranaha. Ikiahatsa ahamysapybyitsa tu tsikykaranaha batu tymoewy. Tahatsiktu nikaranaha iwatsahi pahasininiwyky hÿ.

<sup>6</sup> Bykyze Deus kytsa atsehezubaha bo ihuak ty sibo nyny my. Hawa mozurukunahaze ihuak ty sibo nyny my. <sup>7</sup> Wastuhu mybarawy ezektsa ustsä kytsa nisisapywyky-naha. Iwa Deus sisoho wasani haty motsasoko anahi mozhikiknaha. Tahawahi Deus tuk mynapykyryk tsihikiknaha ana hi taperyky. Deus harere bo zuba hÿ mozhikiknaha

iwaze Deus tyryktsa moziknaha. Myhyrikosokdanahaze Deus tuk tahawahi mynapykyryknaha hÿ. <sup>8</sup> Utsaktsa batu. Deus harere bo batu yhÿ ziknakaranaha. Sisopyksapybyitsa tu nikaranaha Deus taokaniki iwatahi ihuak ty sibo nyny my ana hi wasani my.

<sup>9</sup> Deus mysininiwyky mysimyitsapyriwyky. Sudeutsa, Sudeutsabyitsa bo kino niwatihi kytsa sizubarëtsa asaktsa pimyikinaha simysapybyitsa tu nikaranaha humo ihuak ty sibo nyny my, ana hi wasani my. <sup>10</sup> Asaktsa ustsaktsa kytsa bo mysisapywykynaha ihuak ty sibo nyny my. Sudeutsa Sudeutsabyitsa bo kino niwatihi myzubaha bo my. Simysapyrëtsa tu Deus mysisoziuku. Simyharerewabynikitsa moziknaha. Ba paikpa mytsaty zikaha ihumo sakurëtsa moziknaha Sudeutsa, Sudeutsabyitsa bo kino niwatihi mykara. <sup>11</sup> Deus okzeka atsezubaha nimysukni, myzubaha humo tsimypokzitsiukrëta iwaze Sudeutsa, Sudeutsabyitsa humo kino niwatihi ihuak ty Deus sibo nyny myze wasani.

<sup>12</sup> Sudeutsabyitsa Moises sopykwy ty humo batu sihyrinymyry. Iwatsahi Deus harere Moises ziwatahakanaha batu tyny. Iwatsa tu mysapybyitsa tu nikaranahaze Deus sinini ykarawy bo mysipehahik. Batu ispe my:

— Moises sopykwy humo ka batu yhÿ tsimykaranaha — my. Iwa batu tyso. Moises sopykwy humo ka batu tyny. Sudeutsa zuba Moises sopykwy humo sihyrinymyrëtsa. Iwatsa tuze simysapybyitsa tu nikaranaha Deus sinini ykarawy bo mysipehahik. Ispe my:

— Ikiatsa kaharere bo batu yhÿ tsikaha. Kaharere Moises ziwatahakanaha batu yhÿ zikaha — my.

<sup>13</sup> Asaktsa Moises sopykwy humo hyÿ mykaranahaze wasaniatsa mykaranaha. Deus ispe my:

— O ikiatsaktsa ahamysapyrëtsa — my. Asaktsa Moises sopykwy humo waby zuba sisopyk, iwaze ana



harere bo batu hỹ mykaranaha Deus okzeka batu simysapy iwatahi ba ziksibetesaka.

<sup>14</sup> Sudeutsabyitsa batu Moises sopykwy sinyhy. Iwatsatu wastuhu kytsa sinyhybyitsa tu ana papeu humo hi hyỹ mykaranaha kytsa watsa asahi papeu humo sihyrinymyrẽtsa. Nawa ha ty wasanikia ty Sudeutsabyitsa sihyrinymyrẽtsa. <sup>15</sup> Hawa mozurukunaha, ustsas kytsa sibo iktsa mykaranahaze asahi:

— Asaktsa batu Moises sopykwy. Sinyhybyitsa tu iwatsa tu wasani sihyrinymyrẽtsa. Hawa imysapybara ty sihyrinymyrẽtsa — maha. Iwa hỹ. Tahapetu sisopyk:

— Ana hi wasani. Ana hi batu mysapy — maha. Sispirikporẽtsa maha. Iwa ustsas kytsa sisoho mytsaty mynakaranaha.

<sup>16</sup> Bykzehu ana humo kino nawa my. Hawa kytsa mozurukunaha Sesus Kiristu sihuak ty sibo nyny my. Deus wasania ty motsasokoro anahumo kino hyỹ mykara. Hawa mytsaty tsimykaranaha ustsas kytsa batu sihyrinymyry, Deus zuba mysoho humo tsihyrinymyrẽta iwatahi ihuak ty mybo nyny my.

*Sudeutsa Deus harere ibyky Moises ziwataha ana bo batu hỹ nikaranaha.*

<sup>17</sup> Ikiahatsa ja:

— O katsaktsa Sudeutsa tsimaha. Deus harere ibyky Moises ziwataha ana bo hyỹ tsimykaranaha ana humo hi mysapyrẽtsa. Deus taparaktsa humo nisiwatawy iwatsahi ityryktsa tsimoziknaha — tsimykaranaha. Iwa tsinapamykysokonaha. <sup>18</sup> Katsa hi:

— Hawa Deus mozikik myhyrinymyrẽtsa. Moises harere humo wasani haty tsinymyrykynaha imysapybara tyka kino niwatihi tsinymyrykynaha Moises sopykwy humo ka myhyrinymyrẽtsa, tsinymyrykynaha — tsimaha.

<sup>19</sup> Utsa kytsa Moises sopykwy humo batu sihyrinomyry. Iwaze ikiahatsa hi:

— Katsa zuba iharere humo myhyrinomyrëtsa. Katsakta utsa kytsa tahahyrinomyry tsihikik. Asahi sihyrizikubyitsa watsa, iwatsahi mysitsumuëhîna. Katsakta rika watsa myhyrinomyrëtsa tu utsa kytsa bo wasania ty sibo tsimytsasokonaha. Katsa kytsa mysihyrinomyrynahaze sispirikporëtsa moziknaha iwatsahi rika watsa tsimaha. <sup>20</sup> Sihyrinomyrybyitsakta tahahyrinomyrykynaha. Asahi tsikaeni zuba sihyrinomyrëtsa. Katsakta Moises sopykwy humo tsinomyrybanaha iwatsahi sispirikpobyitsa bo tahahyrinomyrykynaha — tsimykaranaha. <sup>21</sup> Utsa kytsa bo ahaspirikpowy tsimysihyrinomyryikiknaha. Ahape tu batu ahasopyk. Ahaspirikpowy humo batu hÿ tsimykaranaha. Ikiahatsa hi:

— Utsa namy humo ba zikmytsyhyryboanaha — tsikykaraha. Ikiahatsa ja. Utsa namy humo tsikahatsyhyryboakanaha.

<sup>22</sup> — Utsa okeza ba ziksihuahuanaha — tsikykaranaha. Ikiahatsa ja. Utsa okeza tsimysihuahuanaha.

— Deustsabyitsa bo ka ahanamy ty batu nyny zikaha! — tsikykaranaha. Ikiahatsa ja. Deustsabyitsa wahoro bo tsimypupunaha iwatsahi sinamy ty tsikahatsyhyryboakanaha. Iwa tsimykaranaha ahamysapybyitsa siwatsa tsimykaranaha. Asakta batu imysapy maha iki-ahatsa kino niwatihi batu ahamysapy tsimaha <sup>23</sup> Kytsa sizubarëtsa pe tsimaha:

— Katsakta Moises spirikpowy humo tsinomyrybanaha — tsimaha. Ana harere ty batu hÿ tsimykaranaha, iwatsahi Sudeustsabyitsa ahahumo Deus harere bo batu ma zikaha. <sup>24</sup> Iwaze Deus harere papeu humo botu ziwataha:

— Sudeutsabyitsa Sudeutsa humo, Deus soho pisapybyikinaha Sudeutsa nisimyinahatsa iwatsahi Sudeutsabyitsa Deus soho pisapybyikinaha — niy.

<sup>25</sup> Katsakta Sudeutsa mypiak humo tsizyzykynaha. Wasani tsimaha. Tubabatu Moises tihi:

— Ahapiak tyzyzyknaha anahi awatawy Deus hyrytsa tsimaha — niy. Iwaze mypiak tsizyzyknaha Moises mype niwatihi hawa tsimyzurukunaha, ana ty hi mymyhyrinymyryky.

— Ikiatsa Moises spirikpowy tsizubarēna bo yh̄y ahabyi zeka iwaze ahahyrytsa ty zyzykbyitaha mahani iwatawywy. Ikiatsa Sudeutsabyitsa watsa, asahi Moises spirikpowy batu ahawabyhy asahi Deus harere humo batu sihyrinymyry. <sup>26</sup> Sudeutsabyitsakta batu sipiak zyzykyhyk. Iwatsatu pisapywykynaha iwa Moises spirikpowy humo mykaranaha zeka Sudeutsa watsa moziknaha. Deus okzeka ihyrytsa moziknaha, iharere bo hȳy mykaranaha humo. Sipiakzyzykbyitsa kino Deus okzeka ihyrytsa moziknaha.

<sup>27</sup> “Katsakta Sudeutsa tsimaha mypiak tsizyzyknaha Moises spirikpowy humo myhyrinymyrētsa. Iwatsahi nawa tsimyzurukunaha zetu tsinymyrykynaha.” Iwa batu tsimykaranaha Deus harere bo batu h̄y tsimykaranaha. Sudeutsabyitsa sipiakzyzykbyitsa. Moises spirikpowy humo batu sihyrinymyry. Wastuhu wasani mozurukunaha ana harere bo hȳy mykaranaha iwaze Deus okzeka simysapyrētsa moziknaha. Sihyrinymyrybyitsa tuze iharere humo wasani mykaranaha. Ikiatsa Sudeutsa tsimaha iharere bo batu h̄y tsimykaranaha iwatsahi Deus okzeka batu ahasapy tsimaha.

<sup>28</sup> Katsakta tsipisapykynaha Deus harere bo hȳy tsimykaranaha zeka ihyrytsa tsimoziknaha. Katsakta mypetu mysopyk zeka:

— O katsaktsa Deus tyryktsa iwatsahi myhyrytsa piak tsizyzyknaha. Moises spirikpowy humo myhyrinymyrëtsa iwa Deus hyrytsa tsimaha — mybarapetu mysopyk. Ikiatsa iharere bo hyÿ zikahabyitsa tu iwatahi Deus batu tyso:

— Ikiatsa kahyrytsa tsimaha — iwa batu tyso. <sup>29</sup> Uta ahape:

— Aty sa Sudeu babata my. Aty sa Deus hyrytsa maha. Atahi Deus harere bo hyÿ mykara, atakta Deus harere mozihikik — my. Deus hyrikoso ituk mynapykyryk. Wastuhu sipiakzyzykykbyitsa Deus harere bo hyÿ mykaranaha. Iwaze Deus ispe my:

— O ikiatsa ahamysapyrëtsa — my. Kytsa sisoho humo batu siharereziu Deus zuba sisoho mysiharerez-iuku. Kytsa sizubarëtsa Sudeutsa, Sudeutsabyitsa kino niwatihi Deus harere bo hyÿ mykaranaha zeka, asaktsa Deus hyrytsa babatsa moziknaha hÿ.

### 3

<sup>1</sup> Kytsa sizubarëtsa Deus harere bo hyÿ mykaranahaze Deus hyrytsa moziknaha. Iwatu wastuhu ahatukze tihi:

— Amy skaraba Sudeutsa tsimaha. Amy skaraba myhyrytsa piak tsiksizyzyknaha. Tymytsumuëhÿnaha ja — tsimaha. Iwa batu tyso. <sup>2</sup> Uta tihi:

— Pahatsumuëhÿnaha hÿ. — Mydiritsa zizyzyknaha humo Deus hyrytsa ziwatahawy iwaze Deus Moises bo nitsasoko, atahi taparaktsa mydiritsa bo nitsasoko. Ata humo hi Moises spirikpowy ziwataha. Iharere Sudeutsa taparaktsa bo zuba nitsasoko aiba zuba usts kytsa iharere piwabynaha. <sup>3</sup> Sozeka ja ikiatsa kape:

— Mydiritsa Moises harere bo yhÿ nikaranaha. Wastuhutsa taparaktsa mydiritsa Deus harere bo batu hÿ nikaranaha. Iwa zeka Deus harere sibo batu hÿ my —

tsimaha. Batu ba Deus wasani mynakara. <sup>4</sup> Hawa ha ty Deus motsasoko atsatu isopyk. Deus ba zikmispihikbata. Kytsa sizubarētsa mospihikbatakanaha zeka Deus batu. Deus harere papeu humo botu ziwataha:

— Tsimytsasokoze kytsa sizubarētsa tihi “O Deus aharere wasani my” maha.

Asahi tihi zeka iharere batu isapy maha asahi zimyikinaha siharere batu wasani my

Deus zuba wasani

Deus papeu niy.

<sup>5</sup> Tozeka ja wastuhutsa kytsa motsasokonaha:

— Katsaktsa wasanihabyitsa tu tsimykaranaha zeka kyze kytsa mybo iktsa maha zeka “O Deus zuba pisapyky” mykaranaha, iwatsahi mysapybyitsa tu tsimykaranaha Deus soho kytsa mysihyrinymyrykynaha — maha. Asahi:

— Mysapybyitsa tu tsimykaranaha zeka Deus zuba tsimysapyrēta kytsa mysihyrinymyry. Iwatahi Deus ihuak ty mysapybara ty humo batu nyny ziky batu wasani ziky — maha. Mybarawy Ezektsa watsa mytsaty mykaranaha asahi iwa mopamykysonaha. <sup>6</sup> Niwazuba! Deus siwa batu mytsaty ziky myhumo wasani isopyk. Atahi tisopyksapyrēta mybarawy Ezektsa mywatu ihuak ty mybo nyny my. Hawa mozurukunaha humo ihuak ty nyny my. Wasani byitatu zeka ana kino batu ziky, atahi imysapyrēnikita tu iwatahi mybarawy Ezektsa bo ihuak ty nyny my.

<sup>7</sup> Tozeka ja kape tsimaha:

— O utakta wasani ahabyizeka asaktsa kabo iktsa mahaze tihi: “O Deus zuba wasani mykara” maha. Kamysapy byizeka kytsa tihi: “O Deus ikia zuba amysapyrēnikita” maha. Iwatahi kytsa Deus soho kahumo sihyrinymyrētsa. Deus sinini ykarawy bo pikpeha zeka batu isopyksapy

kaokzeka batu wasani — my. Iwa batu tyso. <sup>8</sup> Ana humo kino wasape tsimaha zeka ikiahatsa tihi:

— O mysapybyitsa tu tsimykarannahaktsa kytsa! Iwa kytsa sizubarëtsa Deus harere bo hyÿ mykaranaha, atahi imysapyrënikita maha — tsimaha. Batu ba. Ana harere hi asaktsa kytsa kahumo batu siakparawy motsasokonaha. Iwa piksohometukunaha — ana soho hi Pauro motsasokoro — mybarapetu mykaranaha. Asaktsa Deus mysisininiwyky. Atahi ispe my:

— Ikiahatsa batu ahamysapy — my.

*Batu aty tohi Deus okzeka tisopyksapyrëta.*

<sup>9</sup> Kyze wastuhutsa tihi:

— O katsaktsa Sudeutsa wasani tsimaha Deus harere mybo nitsaso. Sudeutsabyitsa batu, Deus sibo ba ziksaso. Iwa Deus okzeka batu sapy maha — mykaranaha. Katsaktsa Sudeutsabyitsa watsa myzubarëtsa. Tsimysapybyi tsihikiknaha mysapybyitsatu tsimykarannaha batu tymoewy. Iwa botu icy. <sup>10</sup> Deus harere botu papeu humo ziwatahaka: — Mybarawy ezektsa batu wasani zikaha. Batu aty tohi isopyksapy.

Kytsa sizubarëtsa batu wasani zikaha.

<sup>11</sup> Wasaniha humo batu sispirikpo,

batu aty tohi tawahi Deus tuk mopykyryk tsihikik

<sup>12</sup> Kytsa sizubarëtsa Deus soho bo batu mytsaty mykaranaha.

Imysapybara zuba mozhikiknaha.

Batu aty tohi tsimysapyrëta. Suknihabyitsa.

<sup>13</sup> Siharere batu imysapy. Siharerewabymybarëtsa.

Pibytuhukunaha tu mybarapetu mynakaranaha mysispihikbataikiknaha zuba.

<sup>14</sup> Sisakparënikitsa tu ustsya kytsa mysimyjaikiknaha iwa motsasokonaha.

<sup>15</sup> Mysisukyrykynaha.

<sup>16</sup> Utsa kytsa namysapybyrikinaha nasimyitsapyriwykynaha.

Kytsa mysitsapyriwykynaha.

<sup>17</sup> Siakubyitsa tu ustsya kytsa mysiaknikinaha.

<sup>18</sup> Deus humo batu simyharerewaby. Ihumo batu siakparawy.

Iwa maha — niy. Iwa Deus harere papeu humo mysosho nitsasoko.

<sup>19</sup> Iwa Moises spirikpowy ziwatahaka. Ana papeu humo Sudeutsa Deus soho ty nisihyrinomyryky. Iwaze Sudeutsa batu tyso:

— Katsaktsa Moises spirikpowy humo yhȳ tsinakaranaha — maha. Ana harere tyhi batu hȳ zikaha. Sudeutsabyitsa niwatihi iharere bo batu hȳ zikaha. Iwatsahi myzubaha tahaharere ty harapubeteke ba zikaha. Sudeutsa Sudeutsabyitsa kino niwatihi tahaharere ty harapubeteke ba zikaha. <sup>20</sup> Iwatatu Deus batu ziky:

— O ikia Moises harere bo yhȳ tsimy iwatahi tsamysapyrēta tsimozik — Iwa ba ziktsaso ba ziky. Atahi:

— Moises sopykwy tsipihyrinomyryky zeka amysapybyitsa tu tsimy kara tsmoewy iwatahi kahumo aspirikporēta tsimozik — niy.

*Hawa Deus okzeka mymysapyrētsa tsmoziknaha.*

<sup>21</sup> Aba zuba hawa Deus humo mybarawy ezektsa simysapyrētsa moziknaha nitsasoko. Deus hi:

— Ikiahatsa ahamysapyrētsa tsmoziknaha. Batu Moises sopykwy humo ahamysapyrētsa tsmoziknaha ba zikaha — niy. Ana kino botu Moises nisihyrinomyry. Tubabatu Deus sohokotsa kino niwatihi atsatu nisihyrinomyryky. <sup>22</sup> Deus hi:

— Asa zuba Sesus Kiristu harere bo hȳ mykaranaha asahi kaokzeka simysapyrētsa moziknaha. Sudeutsa,

Sudeutsabyitsa kino niwatihi Sesus harere bo hyĩ mykaranaha zeka kaokzeka simysapyrětsa moziknaha — my.

<sup>23</sup> Batu aty tohi imysapyrěnikita Deus wata my. Astsabanitsa mysapybyitsa tsimynakaranaha. Batu aty tohi Deus wata my. <sup>24</sup> Deus mymysapywyky. Mymysapybyitsa tu tsikykaranaha ana humo hi Sesus Kiristu nihyrikosokda atahi mysapyzekenziakse iwatsahi mysapybyitsa tsikykaranaha ana humo hi batu sinini tsimaha. Sesus Kiristu mysapyzekenzi nihyrikosokda iwatahi Deus mype wasani tsimaha. Deus hi:

— Ikiahatsa Sesus Kiristu harere bo hyĩ tsimykaranaha iwatsahi ahamysapyrětsa tsimoziknaha — my. Iwa mymysapywyky atahi myhumo tsimypokzitsiarěta.

<sup>25</sup> Deus hi Sesus Kiristu mybarawy bo zipaha. Mybarawy bo inasikze mybarawy ezektsa sapyzekenzi nihyrikosokda ana bo izumuze. Kytsa huak ty simysapybyitsa tu nikaranaha ana humo hi nihyrikosokda. Iwaze katsaktsa Sesus Kiristu harere bo hyĩ tsimykaranaha mysapybyitsa tu tsikykaranaha Deus nimyokzohik hỹ. Sesus Kiristu nihyrikosokdaze iwa kytsa simysapyrětsa moziknaha, iwa Deus kytsa nisihyrinymyryky. Tubabatu Deus tsiakubyrisorokrěta tu simysapybyitsa tu nikaranaha sinini ykarawy bo ba ziksipeha. Tapetu isopyk:

— Bykyze katse babata sisapyzekenzi mohyrikosokda iwaze asaktsa kaharere bo hyĩ mykaranaha sinini ykarawy bo ba mysipeha — my. <sup>26</sup> Abaka meky watu kytsa simysapybyitsa tu nikaranaha ana soho mytsaty mykara. Kytsa sizubarětsa bo simysapybyitsa tu nikaranaha humo ihuak ty sibo nyny my. Asaktsa Sesus harere bo hyĩ mykaranaha simysapybyitsa tu nikaranaha batu mytsatyzo ziky.



— Ikiatsa kaokzeka ahamysapyrëtsa tsimoziknaha katse babata ahasapyzeka nihyrikosokda iwatahi pahaokzohik — my. Iwa sispirikporëtsa mykaranaha.

<sup>27</sup> Iwatsahi — katsakta wasani tsimaha — ba ziktasonaha. Mysoho ba ziktsasoziukunaha batu aty tohi tsimysapyrëta my. Deus okzeka Moises sopykwy humo yhyë tsimykaranaha iwaze — mymysapyrëtsa tsimaha — batu zikaha. Katsakta Sesus humo zuba mymysapyrëtsa tsimaha. Ata humo hi myspirikporëtsa tsimoziknahaze Deus mysoho tihi:

— Asakta katse humo zuba simysapyrëtsa moziknaha — my. <sup>28</sup> Katsakta Sesus harere bo hyë tsimykarannahaze Deus okzeka mysapyrëtsa tsimoziknaha. Katsakta Moises sopykwy bo yhyë tsimykaranaha zeka Deus okzeka batu mysapy tsimaha. Iwa hyë. <sup>29</sup> Deus Sudeutsa zuba ja iakparawy. Tozeka ja asa zuba mysisapywyky iwaze simysapyrëtsa moziknaha. Batu ba. Deus kytsa sizubarëtsa mywatuze Sudeutsa Sudeutsabyitsa bo kino niwatihi mysisapywyky, sizubarëtsa Sesus harere bo hyë mykaranaha zeka simysapyrëtsa moziknaha. <sup>30</sup> Deus kytsa sizubarëtsa bo mysisapywy tsihikik. Sudeutsa Sesus harere bo hyë mykarannahaze iwatsahi simysapyrëtsa moziknaha. Sudeutsabyitsa kino Sesus harere bo hyë mykarannahaze iwatsahi simysapyrëtsa moziknaha. Mekiwatu moziknaha. <sup>31</sup> Wastuhu kytsa ahatukze:

— Katsakta Moises sopykwy “O iharere mybo batu imysapy” tsimaha — iwa batu tyso, Sesus harere bo hyë tsimykarannahaze Moises sopykwy humo niwatihi tsimyziwabykynaha.

## 4

*Hawa Abarão nikara.*

<sup>1</sup> Kyze Abarão soho bo mytsaty tsimaha. Atahi taparakta mydiri. Katsaktsa tsekokatsa tsimaha. Deus okezeka tsimysapyrëta niyzik ana hi motsasoko. <sup>2</sup> Deus Abarão pe niy:

— Ikia tsimysapyrëta — niy. Atahi zisapywyky ja iwatahi Deus ipe niy:

— Ikia tsamysapyrëta — niy. Batu ba. Nawa ha ty wasani nikara batu ana humo hi nitsasoko. Iwaze Abarão tapetu isopyk batu tyso:

— Utakta kamysapyrëta — my. Batu ziky. <sup>3</sup> Hawa Deus okzeka tsimysapyrëta niyzik ana ka motsasoko. Atahi Deus harere bo hyÿ ziknakara iwatahi Deus okzeka tsimysapyrëta niyzik. Iwa Deus harere papeu humo botu isoho mybo ziwatahaka.

<sup>4</sup> Aty ipehatsa humo tarabaja mykara zeka ana humo hi ihuak ty okrysarowaka ty nyny niy. Itarabaja humo zuba okrysarowaka ty nyny niy. Wasani my. Deus iwa batu isopyk mykara. <sup>5</sup> Atahi myhumo iakparawy iwatahi iharere bo hyÿ tsimykaranaha zeka mymysapywyky. Asaktsa pisapywykynahaze ana humo hi batu sisoho:

— Ikiahatsa ahamysapyrëtsa — iwa batu tyso. Batu ba. Asa zuba Sesus Kiristu harere bo hyÿ mykaranaha. Iwaze ispe my:

— Ikiahatsa Deus harere bo hyÿ tsimykaranahaze ana humo hi ahaspirikporëtsa tsimoziknaha iwatahi aha pe “tsahamysapyrëtsa” — my. Tapara simysapybyitsa tu nikaranaha iwatsatu Deus harere bo hyÿ mykaranaha tsahi Deus okzeka simysapyrëtsa moziknaha.

<sup>6</sup> Aty zeka Deus okzeka tsimysapyrëta, atakta tsakurëta hÿ. Ba zikmysapybyi iwatahi ja tsakurëta mopykyryk mytsaty ahabyita tsimykaranaha. Sesus harere bo hi hyÿ nikaraze tu iwatahi Deus ipe niy:

— Ikia tsamysapyrêta — nikara, ana harere humo hi tsakurêta niapykyryk. Taparakta mydiri Dawi atsatu nitsasoko:

<sup>7</sup> — Asaktsa Deus harere ibyky Moises ziwataha ana humo batu hỹ nikaranaha batu zikaha.

Asaktsa sisopyksapybyitsa tu nikaranaha Deus Sesus humo zuba nisiokzohik iwatsahi sakurêta.

Simysapybyitsa nikaranahaze ana hi Deus nispirikt-sokda tawata iwatsahi sakurêta.

<sup>8</sup> Deus humo simysapybyitsa tu nikaranaha batu mytsaty ziky iwatsahi sakurêta.

Iwa Dawi taparakta mydiri botu nitsaso — Dawi niy.

<sup>9</sup> Paze ja asaktsa tahapiak zizyzyknaha asa zuba sakurêta. Batu ba. Kytsa kino niwatihi sipiakzyzykyhybyitsa sakurêta niyziknaha. Iwaze Abarão soho bo mytsatyzo tsimahaktsa. Deus harere papeu humo isoho ziwatahaka:

— O Abarão Deus harere bo hỹ ziknakara iwatahi Deus ipe niy: “Ikia tsasopyksapyrêta” niy. Iwa Deus harere papeu humo niy. <sup>10</sup> Anaharere nitsasokoze Abarão ipiakzykyhybyita aibatohi zuba tapiakzyk — iwa nitsasoko. Iwatsahi mypiakzyzykwy humo kytsa sakurêta ba zikaha. Deus kytsa pe my zeka:

— O ikiahatsa ahasopyksapyrêta — my ana humo hi sakurêta. <sup>11</sup> Tapara Abarão Deus harere bo hỹ nikara iwaze Deus ipe niy:

— Ikia tsasopyksapyrêta — niy. Bykyze zuba tapiakpezyk, Deus humo tispirikporêta iwatahi ityryktsa niyzik. Iwa tahi:

— Utakta Deus harere bo hỹ ikykara iwaze Deus kape niy: “Ikia tsasopyksapyrêta” — niy. Iwata Sudeutsabyitsa kino niwatihi sizyzykyhybyitsa tu Deus harere bo hỹ mykaranaha zeka Deus ispe my:

— Ikiatsa ahasopyksapyrëtsa — my. Abarão Deus harere bo hyĩ nikara Sudeutsabyitsa kino niwatihi Deus harere bo hyĩ nikaranaha iwaze Abarão tahadiri wata niyzik. <sup>12</sup> Sudeutsabyitsa sipiakzyzykyhybyitsa tu Abarão watsa maha. Sipiakzyzykyhybyitsa tuze Deus harere bo zuba hyĩ nikaranaha. Sudeutsa niwatihi Abarão watsa mozurukunaha Deus harere bo zuba hyĩ mykaranaha iwaze Deus ispe niy:

— Kaharere bo hyĩ tsimykarana zeka ahasopyksapyrëtsa — my. Asahi mydiri Abarão watsa maha.

*Abarão Deus harere humo hyĩ ziknakara.*

<sup>13</sup> Tubabatu Deus Abarão pe:

— Mybarawy ty abo nyny my. Atsekokatsa nanabyitaba sizubarëtsa hudikhudikwy pehatsitsa moziknaha — niy. Abarão ana soho bo hyĩ niy. Batu sisopykwy bo pykyhy habitatu. Atahi Deus harere bo zuba hyĩ nikara iwatahi Deus ihumo zisapywyky. <sup>14</sup> Kytsa asahi sisopykwytsa humo zuba pykyhytu yhy mykaranaha zeka ana humo hi Deus mysisapywyky iwa zeka mytsaty ahabyitsa tu mykaranaha. Kytsa Deus harere bo hyĩ mykaranahaze isapyrënikia ty sibo nyny my. Iwa Deus mykara iharere wasani my.

<sup>15</sup> Aty Deus harere ibyky pykyhytu yhy mykara Deus okzeka tsimysapyrëta tawata my atahi batu imysapy my. Batu aty tohi iharere ibyky humo yhy zikaha. Iwatahi Deus batu iakparawy.

<sup>16</sup> Iwatahi Abarão Deus harere bo hyĩ ziknakara ana humo Deus ipe niy:

— Utakta pasapywyky hy iwa mozihikik — niy. Deus nikaraze pasapywyky iwaze atsatu mykara. Iwatsahi kytsa sizubarëtsa Deus harere bo hyĩ mykaranaha Abarão watsa iwaze Deus mysisapywyky. Abarão mydiri wata. Abarão Deus harere bo hyĩ nikara, katsa kino niwatihi

iharere bo hyĩ tsimykaranaha, iwatsahi ihumo myspirik-porētsa tsimoziknaha.

<sup>17</sup> Tubabatu Deus tapetu nikara:

— Kaokzeka Abarão aparakbahazo wata my. Atakta kaharere bo hyĩ mynakara asaktsa niwatihi nanabyitaba kaharere bo hyĩ mykaranaha iwata moziknaha — niy. Iwa Deus Abarão bo mytsaty niy. Deus ba hawa tohi zikzukninaha. Siakbatsa mynasihyirizikpowy. Ana ty hi mybarawy isuknihyize taharere humo inatakaha. Kyze Deus Abarão pe:

— Ikia izo tsimozik. Atsekokatsa sizubarētsa maha. Kytsa sizubarētsa nanabyitaba ape mydiri mynakaranaha — niy. <sup>18</sup> Kyze Abarão tapetu nikara:

— Hawa Deus kape niy atsatu mykara — nikara. Nitsaikbata tu ihyrytsa byita. Iwatatu ziperyikik Deus harere bo hyĩ nikara, iwaze Deus harere humo tatse ziperyky. <sup>19</sup> Abarão nitsaikbata. Asiba sē anos niytyk tseheze itse nipuruk nitsaikbabaze. Ioke Sara kino niwatihi nitsaikbatatsa tu. Iwatatu tapetu ziknakara:

— O utakta katsebyita. Kaoke niwatihi itsaikbatatsa ba ziktabykyhy. Iwatatu Deus harere bo hyĩ mykara iwatahi katse mopuruk — niy. <sup>20</sup> Iwatahi batu tyso:

— Tozeka ja Deus katse kabo myzipeha ja — iwa batu tapetu ziknakara. Atahi:

— Utakta iktsaikba iwatatu Deus harere humo katse mopuruk. Deus pe niy “ikia zuba amysapyrēnikita. Piksapywyikik” — nikara. Pibiyituhukutu Deus harere bo hyĩ ziknakara. <sup>21</sup> Abarão hi:

— Kytsa zikahabara ty atsatu Deus mykara, iwatahi izikwy humo katse mopuruk — my. Iwa tapetu ziknakara. <sup>22</sup> Iwatahi Deus ipe niy:

— O kaokzeka wasani tsimy — niy. Iharere bo hyĩ mykaraze tu Deus okzeka tisopyksapyrēta niyzik. <sup>23</sup> Deus harere papeu humo botu ziwatahaka:

— Abarão Deus okzeka tisopyksapyrēta — niy. <sup>24</sup> Ana harere myhumo kino niwatihi ziwatahaka. Taparaktsa papeu humo ziwatahanahaze:

— Ikiahatsa ahasopyksapyrētsa tsimoziknaha. Deus harere bo hyĩ tsimykaranaha zeka Abarão wata — iwa taparaktsa nimyhyrinymyrykynaha. Deus humo Abarão oke tatse zipuruk.

Deus tse Sesus Kiristu inahyirizikpowy iwatsahi kat-saktsa iharere bo hyĩ tsimykarannahaze Deus mypehatsa mozik. Sesus Kiristu zihyirizikpowy ata bo hi hyĩ tsimykaranaha. <sup>25</sup> Deus tse Sesus Kiristu mybarawy bo inasik. Mysapybyitsa tu tsikykaranaha humo ni-hyrikosokda. Mysapy zeky nihyrikosokda ana hi. Myhuak niyzik, abaka mysapybyitsa tu tsikykaranaha katse humo mymokzohik. Deus zihyirizikpowyze mype my:

— Ikiahatsa Sesus harere bo hyĩ tsimykaranaha zeka katse humo ahasopyksapyrētsa tsimoziknaha — niy.

## 5

*Deus harere bo hyĩ* tsimykaranaha zeka ana humo hi myspirikporētsa tsimoziknaha.

<sup>1</sup> Abaka katsa Sesus harere bo hyĩ tsimykarannahaze mykurētsa tsimoziknaha. Batu paikpa mytsaty tsimykaranaha. Taparaka Deus myhumo taokaniki abaka mahani. Sesus harere bo hyĩ tsimykaranaha iwatsahi Deus harereziuwyttsa tsimoziknaha. <sup>2</sup> Sesus Kiristu hi:

— Asaktsa kaharere bo hyĩ mykaranaha — niy. Iwaze Deus myhumo mymypsapywyky iwatahi mymytsumuēhikĩ iwa tsimyzurukunaha. Ana humo hi mykurētsa, aibatohi Deus watsa tsimoziknaha anahi taperykynaha.

<sup>3</sup> Abaka tsihokdaharēna humo sinini tsimykaranaha zeka mykubyrisorokrētsa tsimoziknaha. Mypuni-hikrētsa tsimoziknaha. Iwatsahi mykurētsa hỹ.  
<sup>4</sup> Mykubyrisorokrētsa zeka Deus mype:

— O ikiahatsa ahamysapyrētsa — my. Iwa myhumo mymybetesakaze. Iwatsa tsimoziknaha ana hi taperyky-naha. <sup>5</sup> Aibatohi Deus watsa tsimoziknaha anahi wasani hỹ. Ana hi taperykyze wasani mytsaty tsimykaranaha, Deus myhumo tsimypokzitsiukrēta tahyrikoso humo kino mymyhyrinymyryky.

<sup>6</sup> Katsaktsa mysapybyitsa tsikykarannahaze Kiristu my-pokzi mysapyzekenihyrikosokda. Nawa zuruze Deus botu ziwatawyze Kiristu nihyrikosokda. <sup>7</sup> Batu aty tohi usta sapyzekenihyrikosokda. Aty zeka ja sisopyktsa pykyhytu yhỹ mykara tsihokdaharēna isapyzekenihyrikosokda batu aty tohi nihyrikosokda tsihikik. Atakta ustsakysa humo mysisapywykik tozeka ja aty zeka isapyzekenihyrikosokda.

<sup>8</sup> Kiristu ta meky watu my. Katsaktsa mysapyby-itsa tu tsikykarannahaze iwaze hi Kiristu mysapyzekenihyrikosokda. Kiristu mysapyzekenihyrikosokda ana bo hi mytsaty tsimykaranaha. Deus myhumo tsimypokzitsiukrēta babata ana humo hi myhyrinymyrētsa.  
<sup>9</sup> Kiristu mysapyzekenihyrikosokda abaka iharerezi-uwysa tsikyziknaha. Ihumo Deus mype:

— O ikiahatsa ahamysapyrētsa — mykara. Iwatahi Deus sinini ykarawy bo ba zikmypeha iwa hỹ.

<sup>10</sup> Tapara tuze katsaktsa Deus sukyrytsitsa tsikykaranaha. Abaka mahani. Katsaktsa iharereziuwysa tsimaha, Kiristu mysapyzekenihyrikosokdaze iwatsahi Deus harereziuwysa ihumo tsikyziknaha. Abaka katsa Deus harereziuwysa tuze Kiristu ispitu niyzikzo mymytsumuēhikĩ hỹ. Hawa mozihihikizikwy humo hi

tsimykaranaha. <sup>11</sup> Sesus Kiristu mypokzi nihyrikosokda iwaze Deus harereziuwytša tsikyzyknaha. Ana humo kino Deus hi:

— O ikiahatsa kaharereziuwytša — niy. Iwatsahi mykurêtsa hỹ.

*Taparakta Adão Kiristu ahatsa soho mytsatyziu tsimykaranaha.*

<sup>12</sup> Taparakta Adão Deus nizukni atahi isopyksapybyita nikaraze nihyrikosokda. Abaka katsa mywatu mysopyksapybyi humo tsimykaranahaze Adão watsa tsimyhrikosokdanaha. <sup>13</sup> Taparaktsa Deus harere ibyky Moises ziwataha humo sihyrinymyrybyitsa tu iwatsa hi sisopyksapybyitsa tu nikaranaha ana humo hi nihyrikosokdanaha. <sup>14</sup> Iwaze mybarawy ezektsa sisopyksapybyitsa nikaranaha nihyrikosokdanaha. Simysapybaratsa nikaranaha batu atsatu Adão sapybyri waka niy. Kytsa sizubarêtsa simysapybyitsa tu nikaranaha humo mohyrikosokdanaha.

Adão soho bo mytsaty tsimykaranaha. Itsekokatsa iwata sisopyksapybyitsa tu nikaranaha. Asaktsa Sesus Kiristu harere bo hỹ mykaranahaze ityryktsa moziknaha iwata moziknaha simysapyrêtsa moziknaha. <sup>15</sup> Asaktsa petoktsa meky watu maha, Adão Kiristu ahatsa. Adão estuba zubata atahi Deus harere bo batu hỹ ziky iwaze isopyksapybyita tu nikara itsekokatsa kino niwatihi iwata sisopyksapybyitsa tu nikaranaha, iwatsahi sinini nikaranaha.

Kiristu ata zubata niwatihi atahi Deus harere bo hỹ ziknakara. Deus imysapyrênikita tu isapyrênikia ty kytsa bo nyny isopyk. Mymysapywyikik. Atahi Kiristu mybo inasik mysopyksapybyitsa tu mykaranaha ihumo mymyokzohik. Iwaze Kiristu ata zubata tu nimysapywyky atahi nihyrikosokda anahumo kino kytsa sizubarêtsa



ihumo simysapyrëtsa moziknaha. <sup>16</sup> Deus kytsa bo mysapywyky ahabo motsasoko. Kytsa sisopyksapybyitsa tu mykaranaha Adão humo ahabo motsasoko. Adão Kiristu ahatsa meky watu maha. Adão isapybyita niyze Deus ipe niy:

— Kaokzeka batu amysapy — niy. Mybarawy ezeke-tsa, Adão tsekokatsa tu simysapybyitsa tu mykaranaha iwatahi Deus ispe my:

— Kaokzeka batu ahamysapy tsimykaranaha — niy. Sisopyksapybyitsa tu nikaranaha iwatahu asaktsa Sesus Kiristu harere bo hyĩ mykaranaha Deus ispe my:

— Kaokzeka ahamysapyrëtsa — my. <sup>17</sup> Taparakta Adão imysapybyita tu nikara. Itsekokatsa niwatihi iwatu sisopyksapybyitsa tu nikaranaha. Iwatsahi mybarawy ezeke-tsa mohyrikosokdanaha. Sesus Kiristu tsimysapyrëta tu nihyrikosokda. Iwatsahi ihumo Deus mymysapywyikik. Kytsa Sesus Kiristu harere bo hyĩ mykaranahaze Deus ispe my:

— Kaokzeka ahasopyksapyrëtsa — my. Iwatsahi asaktsa Deus tuk tahawahi mynapykyryknaha, Kiristu zikwy humo sipunihikrëtsa moziknaha.

<sup>18</sup> Iwaze taparakta Adão isopyksapybyita tu nikara. Deus harere bo batu hyĩ niy. Itsekokatsa niwatihi iwata sisopyksapybyitsa tu nikaranaha. Iwatsahi Deus ispe niy:

— Ikiyahatsa batu ahamysapy iwatsahi ahawahi sinini tsimykaranaha — niy. Sesus Kiristu Deus harere bo hyĩ ziknakara iwazehi mybarawy ezeke-tsa iharere bo hyĩ mykaranahaze Deus tuk tahawahi mynapykyryknaha.

<sup>19</sup> Estuba maku Adão inarokota Deus harere bo batu hyĩ niy. Iwatahi ihumo mybarawy ezeke-tsa Deus okzeka batu simysapy niyziknaha. Adão watsa zimyikinaha. Sesus Kiristu atahi Deus harere bo hyĩ ziknakara. Iwatahi Deus kytsa sizubarëtsa pe:

— Kaokzeka ahamysapyrētsa tsimoziknaha. Kaharere bo hỹ tsimynakaranaha Kiristu watsa batu mymyiwy — my.

<sup>20</sup> Tubabatu Moises Deus harere ziwatahaka. Ataharere humo Moises sopykwy nisihyrinomyry. Mybarawy ezektsa ana harere humo batu h̃ niaha, iwaze sisopyksapybyitsa naobaranaha. Kytsa sisopyksapybyitsa tu nikaranaha niubara iwaze Deus isapyrēnikia kino niwatihi niubara. Atahi imysapyrēnikita my.

<sup>21</sup> Iwaze mybarawy ezektsa sisopyksapybyitsa ziknakaranaha mohyrikosokdanahaze sinini ykarawy bo maha. Deus hi imysapyrēnikita nimysapywyky, iwatahi Kiristu mybarawy bo inasik mysopyksapybyitsa tsimykaranaha Deus ihumo mymyokzohik. Mysopyksapybyiri tawahi tamoewy iwatsahi Sesus harere bo hỹ tsimykaranaha zeka tsimyhyrikosokdanahaze Deus tuk mywahi tsimynapykyryknaha h̃y.

## 6

*Mysopyksapybyika tamoewy. Deus harere bo hỹ tsimahaktsa.*

<sup>1</sup> Kyze mysopyksapybyitsa tu tsimykarannahaze iwa zeka Deus mymysapywytohi. Ana humo hi tozeka ja wastuhu kytsa tihi:

— Mysopyksapybyitsa tu tsimahaktsa kytsa! Iwaze Deus isapyrēnikia ty mybo nyny my h̃ — maha. <sup>2</sup> Nawa batu tyso. Nihyrikosokdata batu amy tohi ty ziky. Iwatsa katsa Sesus Kiristu harere bo hỹ tsimykaranaha zeka mysopyksapybyitsa tu tsikykaranaha batu tsihik. <sup>3</sup> Nimyharasusunahaze Kiristu tuk tsinapykyryknaha, iwatsahi iwata atsatu mytsaty tsimykaranaha ana hi ahahyrinomyrētsa h̃y. Kytsa nimyharasusunahaze mysopyksapybyi

tsimoewynaha, nihyrikosokdata wata mysopyksapybyity ka ba zikahazonaha. <sup>4</sup> Nimyharasusunahaze:

— O hawa Kiristu mozhikik naha wa zuba hyŷ tsimykaranaha — maha ana hi ziwatawy. Kiristu nihyrikosokda izo hi nizihikik Deus zikwy humo inahyrikipo. Iwata hawa Kiristu mozhikik ana humo hi hyŷ tsimykaranaha, iwaze mysopyksapybyritsa tu tsimykaranaha tamoewynaha Sesus watsa mytsatyo, meky watu tsimyzurukunaha. Sesus zikwy humo meky watu tsimoziknaha.

<sup>5</sup> Kiristu mysapyzky iharapatawyhyta humo nihyrikosokda. Ana hi nizihikik. Katsakta mysopyksapybyiwy tamoewyba. Ana hi tsimyzihikiknaha. Deus zikwy humo Kiristu inahyrikipo. Katsa meky watu tsimoziknaha Sesus Kiristu zikwy humo mekywa tu tsimyzurukunaha. Ihumo zuba mysapyrētsa tsimoziknaha.

<sup>6</sup> Tapara hawa ha ty batu imysapy tsikykaranaha. Abaka hawa haty imysapybara ty batu typeha zikaha. Mysopyksapybyitsa tu tsikykaranaha mysukatsihikrētsa tsikaha. Abaka meky watu tsimoziknaha, meky watu tsimyzurukunaha tisapyrēna humo zuba tsimyzihikiknaha. Kiristu nihyrikosokdaze izikwy zuba mytuk mynapykyryk, izikwy humo zuba meky watu tsimyzurukunaha, katsakta tasapywyky myzo wata tsimaha.

<sup>7</sup> Aty mohyrikosokda zeka batu amy tohi bo mytsaty zikaha. Iwaze atakta nihyrikosokdaze, tasapybyi ty ziknakara batu ziky, imysapybara ba zikzihik.

<sup>8</sup> Iwatsahi Kiristu tuk tsinapykyryknaha. Kiristu mysapyzky nihyrikosokda iwahahi nizihikik. Katsakta mysopyksapybyitsa tu tsimykaranaha tamoewy tsihikik iwatsahi Kiristu tuk mywahi tsinapykyryknaha, iwa mytsaty tsimykaranaha. <sup>9</sup> Kiristu nihyrikosokdaze petok

zuruze Deus zihyrizikpowy. Abaka ba zikyrikosokdazo. Tawahi mynapykyryk. Ba hawa tohi zikzoninaha.

<sup>10</sup> Nihyrikosokdaze mysopyksapybyiwy ihumo nisiok-zohik. Estuba zuba nihyrikosokda ba zikyrikosokdazo. Abaka Deus tuk tawahi mynapykyryk, Deus mozihikik naha ty zuba mynakara. <sup>11</sup> Iwatsahi ikiahatsa ahasopyksapybyiwy tsimoewynaha kytsa meky watu tsimoziknaha. Kiristu harere bo zuba hỹ tahaktsa ana humo hi mytsatyziu taha!

<sup>12</sup> Iwatsahi imysapybara ba zikzihiknaha. Imysapybara bo ka mytsaty mytsaty byitaha! Batu tyso — Estuba zuba imysapybara piakpy tsihikik — iwa ba zikaha. <sup>13</sup> Ikiahatsa Deus tyryktsa. Deus zuba ahapehakatsa. Iwatsahi ahasopyksapybyitsa tsimykarannahaze niwazuba pyktaha! Tapara imysapybara ty tsikykaranaha iwaze hi sinini tsikykaranaha. Abaka mekywa tu tsimyzurukunaha, Deus tuk ahawahi tsinapykyryknaha. Iwatsahi Satanas harere bo batu h̃y tsimaha. Mekywa tu tsimaha iwaze tu tyzisapywykynahaktsa! Ikiahatsa tihi:

— O Deus myzo ikia zuba tynamypehakakta. Ikia zuba tymytsumuēh̃ikta iwaze azikwy humo wasani tsimyzurukunaha — tsimaha. Iwa Deus pe tsimahaktsa! <sup>14</sup> Abaka Deus mype:

— Ikiahatsa ahasopyksapyr̃etsa — my. Iwa mybo motsasoko atahi mymysapywyky iwatsahi ihumo zuba wasani tsimykaranaha. Tapara katsaktsa Moises sopykwy bo yh̃y tsikykaranaha zeka iwa batu tyso. Iwaze Deus mymysapywyky ana humo hi Satanas harere bo batu h̃y mysopyk. Imysapybara ty ka ikiahatsa ba ziaksenaha.

*Abaka Deus harere bo zuba hỹ tsimykaranaha.*

<sup>15</sup> Katsaktsa Deus okzeka mysapyr̃etsa tsimoziknaha. Deus hi Kiristu zipedahik mybarawy bo inasik atahi

mypokzi nihyrikosokda nawa Deus mybo zisapywyky. Moises sopykwy bo yh̄y tsikykarannahaze ana humo hi mysopyksapybyitsa tu tsikykarannaha, sisopykwy bo yh̄y tsikykarannaha. Abaka Sesus harere bo hȳy tsimykarannaha zeka ana humo hi Deus okzeka mysapyr̄etsa tsimozikannaha. Tozeka ja ana humo hi wastuhu kytsa tihi:

— Katsaktsa mysopyksapybyitsa tu tsimykarannaha zeka wasani tsimaha — iwa motsasokonaha zeka batu imysapy. <sup>16</sup> Ikiahatsa aty bo tsimaha zeka:

— O ikia kapehatsa — tsimaha.

Yh̄y atakta ahapehatsa mozik. Iharere humo zuba ma tsimykarannaha. Batu petoktsa ahapehatsa, estuba zuba ahapehatsa. Aty zeka imysapybara ty myzihikik atsatu mykara, atahi mohyrikosokdaze sinini ykarawy bo my. Aty zeka Deus harere bo hȳy mykara Deus ibo pisapywyky hawa tisapyr̄enikia ty mozihikik, iwatsahi wasani mykarannaha, mohyrikosokdanahaze Deus tuk tahawahi mynapykyryknaha. Anaharere botu ahahyrinymyr̄etsa batu petoktsa ahapehatsa ana humo hi mytsatzyiutahaktsa kytsa tsimaha.

<sup>17</sup> Taparaka mysapybyitsa tu tsikykarannaha batu pyk tsikaha. Iwaze Deus soho wasania ty tsiwabynaha. Tsiwabytokto nahaze ana myhyrinymyrywy wasani baba iwatsahi hȳy tsikykarannaha. Iwaze Deus pe:

— O ikia zuba amysapyr̄enikita — tsimykarannaha.

<sup>18</sup> Deus zikwy humo amy ty sa tisapyr̄enikia ty zuba tsimyzihikiknaha. Deus zikwy humo imysapybara tamowynaha. <sup>19</sup> Taparaka tsikmysapybyrikinaha. Imysapybara ty tsikykarannaha. Abaka Deus okzeka ahamysapyr̄etsa tu iwatsahi isapyr̄enikia ty zuba tsimykarannahaktsa!

<sup>20</sup> Tsimiyiwynahaze batu wasani tsimyzurukunaha. Ahamysapybyitsa tu tsikykarannahaze Deus harere bo ma

ahabyitsa tsikykaranaha. <sup>21</sup> Tsimysapybyikinahaze imysapybara ahahuak mozik. Imysapybyikia ty zuba tsiptak-senaha. Kytsa simysapybyikitsa sinini ykarawy bo maha. Iwatsahi ahamysapybara humo mytsaty tsimykaranahaze ahasikpybyrëtsa tsimoziknaha.

<sup>22</sup> Abaka meky watu tsimaha. Deus hyrikoso botu ahatur mynapykyryk iwatsahi ahamysapybyitsa tu tsikykaranaha ba ziktsihiknaha. Imysapybara humo kazekta niwazuba Sesus Kiristu wata tsimoziknaha ana hi ahahuak mozik. Tsimyhyrikosokdanahaze Deus tuk ahawahi tsimnapykyryknaha.

<sup>23</sup> Asaktsa sisopyksapybyitsa mynakananaha humo mohyrikosokdanahaze Deus tuk ba zikokpykyryknaha, sisapy metutu batu Deus tuk zikaha. Ustsaktsa Sesus harere bo hyñ mykaranaha Deus tuk tahawahi mynapykyryknaha. Simysapyrëtsa iwaze Deus mysisapywyky ana humo hi ituk mynapykyryknaha. Asahi Sesus Kiristu tuktsa iwata mytsaty mykaranaha. Iwaze Deus kytsa bo mysisapywyky. Sesus namy huak mahaka kytsa ba kôpara zikaha, Deus hi Sesus tuktsa bo nyny isopyk ituk tahawahi mynapykyryknaha.

## 7

*Maku tasukzazeky ana humo hi mymyspirikpowyky.*

<sup>1</sup> O katukytsa aokze tuze zuba mybarawy ezektsa sopykwy ty yñ tsimykaranaha. Tsimyhyrikosokdanaha zeka sisopykwy bo batu hñ zikaha. Ana humo hi ahahyrinymyrëtsa.

<sup>2</sup> Iwa wytyk ipytsakatatsa tuze tabarikta tuk napykyryk, ibarikta atatu zeka atatsa kino ituk napykyryk. Iwa mybarawy ezektsa sopykwy. Ibarikta mohyrikosokda zeka meky watu maha. Atatsa haramukuka mozik iwatatsatu mektatu piakse wasani my. Mybarawy ezektsa sopykwy.

— Ikia usta maku piakse wasani my — maha. <sup>3</sup> Atatsa ibarikta atatu zeka mektatu ba ziaksenaha, pihuahua zeka mybarawy ezektsa sopykwy tihi:

— Atatsa batu imysapy — maha. Ibarikta mohyrikosokda zeka mektatu piakse zeka wasani my. Ibo tahyrizikwy zeka mybarawy ezektsa sopykwy humo wasani my.

<sup>4</sup> O katukytsa ikiahatsa atatsa watsa tsimaha. Tapara ikiahatsa hi:

— Deus harere Moises sopykwy bo yhỹ tsikykaranaha iwatsahi mysapyrëtsa — iwa mytsaty ahabyitsa tu tsikykaranaha. Ana harere batu wasani my. Moises sopykwy bo hỹ batu zikaha iwatsahi iharere tsimoewykbaiknaha atatsa watsa. Atatsahi ibarikta nihyrikosokdaze zerekik iwaze usta tuk mynapykyrykze wasani my. Abaka ikiahatsa Sesus tuk mynapykyryk ihumo ahamysapyrëtsa tsimoziknaha. Atahi mysapyzeken nihyrikosokda, iwatsahi iharere bo zuba hỹ tsimykaranaha, ihumo myspirikporëtsa tu zeka mysapyrëtsa tsimoziknaha. Iharere bo zuba hỹ tsimykaranaha iwaze ustsya kytsa bo izikwy humo tysisapywykynaha.

<sup>5</sup> Taparaka nawaha zuba katsaktsa tsikzihikiknaha astsatu tsikykaranaha. Mybo zuba mytsaty tsikykaranaha. Deus harere tsiwabynahaze imysapybara humo tsinymyrykynaha. Iwatsatuze mysapybyitsa tu tsikykaranaha Deus mytuk ba zikypykyryk, sinini ykarawy bo tsimaha.

<sup>6</sup> Tapara Moises sopykwy bo yhỹ tsikykaranahatsa watsa katsaktsa ana kino iharere bo hỹ batu zikaha. Abaka Deus namykse, iwatsahi izikwy humo Deus harere bo hỹ tsimynakaranaha. Mekywatsatu tsimoziknaha

Deus hyrikoso mytuk mynapykyryk. Iwaze Deus moz-ihikikze ana ty hi yhỹ tsimykaranaha ihyrikoso humo. Moises sopykwy ana kino Deus harere ibyky papeu humo botu ziwatahaka ana humo ka batu hỹ tsimaha, ana humo hi simysapybyitsa nikaranaha.

*Moises Deus harere ibyky ziwataha ana humo nimyspirikpoko.*

<sup>7</sup>Tozeka ja wastuhu kytsa tihi:

— Moises sopykwy, Deus harere ja. Hawa sa Moises nimyhyrinymyky batu sapy ja — maha. Batu ba. Iwa batu tyso. Ana harere humo hi Deus okzeka batu sapy nimyhyrinymyryky. Deus harere Moises ziwatahaka:

— Utsa namy humo ahazokdibyrhuktsa — my. — Usta namy ty mozihikik zeka ana harere bo hi mytsaty mykara, hawa batu imysapy mykara pihyrinymyryky. Moises sopykwy humo kaspirikporëta.

<sup>8</sup>Ana watahaha zinyze ustsä kytsa namy mozihikik zeka Deus okzeka batu imysapy. Iwatatu usta namy ikzihikik ana watahaha humo hi. Ana harere tisapyrëna iwaze hawa Deus okzeka batu kasapy pikwatawy. Deus harere tisapyrëna. Amy ty sa mozihikik ana ty hi batu imysapy.

<sup>9</sup>Taparaka Deus harere humo batu kahyrinymyry mytsaty habyita ziknakara.

“Utakta Deus okzeka kamysapyrëta” — ziknakara. Kyze iharere humo ikspirikpokoze amy ty batu imysapy kahyrinymyrëta. Iwaze kapetu kasopyk:

— O utakta kamysapybyita tu mykara. Deus okzeka batu imysapy — ikykara. <sup>10</sup>Deus harere mybo nitsasoko iwaze mymytsumuëhikĩ iharere humo hyỹ tsimykaranaha zeka mywahi ituk tsimynapykyryknaha. Ana harere humo hi kapetu kasopyk:



— Utakta kamysapybyita tu ikykara iwatahi Deus tuk kawahi ba zik kapykyryk. Kamysapybyita tu ziknakara ana humo hi Deus tuk ba zik kapykyryk — ikykara.

<sup>11</sup> Taparaka katuktu zuba mytsaty ziknakara:

— Utakta kamysapyrēta — mybarapetu ikykara. Kamysapybyita tu ikykara. Kapetu kasopyk zeka kamyspihikbatarēta mykara. Kyze Deus harere ty zinymyrykyze kamysapybyita tu ikykara ana humo hi kahyrinymyrēta ikyzik. Kamysapybyita tu ikykara Deus tuk kawahi ba zik kapykyryk zinymyryky.

<sup>12</sup> Iwaze Deus harere ibyky anatyhi Moises ziwataha isopykwy wasani my. Anahi mybo nizapiksoko Deus harere my. Ana harere humo hi amy ty wasani mymywatawyky iwatahi kytsa mysitsumuēhī. Ana harere hi isapyrēnikia hỹ. <sup>13</sup> Aty zeka ja:

— Ana harere humo Deus tuk kawahi ba zik kapykyryk kamysapybyi humo iwatahi iharere batu imysapy — my. Deus harere isapyrēnikia zuba. Ana harere humo mybarawy ezektsa simysapybyitsa tu nikaranaha soho mysihyrinymyrykynaha. Kytsa ana harere tyhi sihyrinymyrybyitsa tu iwatsahi tahapetu sisopyk:

— Katsaktsa mysapyrētsa tsimykaranaha — mytsaty ahabyitsa nikaranaha. Utakta Deus harere iwabyze kapetu kasopyk:

— Utakta Deus okzeka kamysapybyita tu ziknakara — iky.

*Moises Deus harere ibyky ziwatahaka naha humo mytsatyziu ikykara.*

<sup>14</sup> Kyze tubabatu Deus harere ty mybo niy. Ihyrikoso humo iharere ziwataha. Deus harere ibyky Moises nimyspirikpoko. Anatyhi isapyrēnikia ty tsipinymyrykynaha. Utakta zuba batu kamysapy mynakara, kasapybyita

tu mynakara. Amy ty sa batu imysapy ana kino yh̃ mynakara iwatatu batu ity tsihik. Tabo zuba mykara zeka iwaze Deus hyrikoso bo batu h̃y ziky. <sup>15</sup> Amy ty batu imysapy mykaraze kapetu kasopyk:

— Amy skaraba kamysopyksapy mykara. Ana kino batu ity tsihik — my. Kamysapybyita tu mykaraze kapetu kasopyk:

— Amy skaraba ana ty hi iky. Isapyrēnikia ty zuba kakparawy, iwatatu batu kamysopyksapy iky — my. <sup>16</sup> Iwatahi kamysopyksapybyita tu kapetu kasopyk:

— Utakta kamysopyksapybyita tu Deus harere zuba tisapyrēna — mykara. Amy skaraba batu imysapybara h̃y mozihihikze anatihi mykara. <sup>17</sup> Amy skaraba batu imysapy batu ity tsihik. Hawa mozihihikze wasanikia ty ana kino kakparawy. Iwatatu hawaha batu imysapy mykara. Wasanibyikia ty yh̃ ikykara iwatahi pimysapybyriwyky. <sup>18</sup> Uta pisapywy tsihikik batu ziky. Hawa wasanikia ty mozihihik batu ziky. Isapyrēnikia batu katuk my. <sup>19</sup> Wasaniha ty mozihihik. Kyze imysopyksapy mykara. Hawa wasanibyikia ty batu ity tsihik iwatatu at-satu mynakara. <sup>20</sup> Hawa mozihihik ana humo hi batu mynakara. Amy humo wasanibyikia ty katuk mynapykyryk ana humo hi kamysopyksapybyita tu ziknakara.

<sup>21</sup> Iwaze wasanikia ty mozihihik zeka ana kino batu ziky. Wasanibyikia ty zuba mynakara. Iwa mozuruku.

<sup>22</sup> Uta hiba Deus harere humo kakurēta mynapykyryk.

<sup>23</sup> Pisapywy tsihikikta tu imysapybara ty zuba mynakara. Imysapybara zuba katuk mynapykyryk iwatahi kamysapybyita tu mynakara. Kapunihikbyita iwatahi yh̃ zuba kasopyk. Iwatahi batu kaku. <sup>24</sup> Kasukatsihikrēta h̃y.

— Aty sa piksumuēhī. Utakta sinini ykarawy bo my. Aty sa pikykse — mykara.

<sup>25</sup> Sesus Kiristu mypehakatsa pikykse hỹ. Ata hi ipuni-hikanikita, iwatahi izikwy humo kapunihikręta mozik. Iwaze uta Deus pe my:

— O ikia zuba amysapyręnikita — mykara. Uta zubaze imysapybara ty zuba mynakaraze, Kiristu zikwy katuk byizeka imysapybara ty mynakara.

Utakta Kiristu zikwy humo Deus harere bo hyỹ mynakara, iwaze imysapybara humo ka ja katy peha peha byity. Niwazuba mynakara.

## 8

*Deus hyrikoso mytuk mynapykyrykze meky watu tsimyzurukunaha.*

<sup>1</sup> Iwatsahi abaka asaktsa Sesus Kiristu zikwy humo mozurukunaha simysapyrętsa moziknaha. Iwatsahi Deus batu sibo tyso:

— Sinini ykarawy bo pahapeha — iwa batu tyso. <sup>2</sup> Deus hyrikoso pikpehaka iwaze izikwy katuk mynapykyryk, ihyrikoso pikpehaze ba zimy. Iwatahi wasanibara humo ka ja katy peha peha byity. Deus sinini ykarawy bo ba zikpeha. <sup>3</sup> Katsaktsa mypunihikbyitsa tu Deus harere bo batu yhỹ tsimykaranaha. Iwatsahi Deus okzeka batu imysapy hỹ, iharere bo ka batu hyỹ ziknakaranaha. Iwaze Deus tatse mybarawy bo zipaha, mywata niyzik. Atahi tsimysapyręta mybarawy bo inasik mywata niyzik. Ata zuba mybarawy ezektsa tuk imysapyręnikia ty ziknakara. Iwatahi mysapyzekenihyrikosokda. Mysapybyikitsa tu tsikykaranaha iwatahi nimysapyzekenihyrikosokda. Mysapybyikitsa tu tsikykaranaha iwatahi nimysapyzekenihyrikosokda. Ihumo batu mymyi.

<sup>4</sup> Deus iwa niy, imysapyręnikia bo zuba tsimykaranaha. Abaka Deus zikwy humo iharere bo hyỹ tsimykaranaha. Ihyrikoso hi mytuk mynapykyryk iwatsahi Deus harere

bo ma tsimykaranaha. <sup>5</sup> Asaktsa taha bo zuba mytsaty mynakaranaha iwahi mozihikiknaha zuba mykaranaha. Ustsaktsa Deus hyrikoso bo yhÿ mynakaranaha Deus harere zuba mysipehaka iwa Deus mozihikik ana ty hi zuba mykaranaha.

<sup>6</sup> Asaktsa taha bo zuba mytsaty mynakaranaha sinini mykaranaha. Deus tuk ba ziktahasapynaha. Ustsaktsa Deus hyrikoso mozihikik ana bo hi mytsaty mynakaranaha atahi mysiakuwyky. Ba paikpa mytsaty zikaha. Deus tuk tahawahi mynapykyryknaha. <sup>7</sup> Aty zeka ta humo zuba mytsaty ziknakara zeka tsiakryiukrêta mozik. Deus harere bo batu hyÿ my ana harere bo ka ba hÿ ziky. <sup>8</sup> Aty zeka tahumo zuba mozihikik ana ty hi mykaraze Deus ihumo batu iaku.

<sup>9</sup> Iwaze ikiahatsa hi Deus hyrikoso bo hyÿ tsimykaranaha. Iwaze hawa skaraba taha humo pahapehakanahaze batu hÿ tsimaha Deus hyrikoso humo pahatsumuêhikĩ. Deus hyrikoso ahatuk zikypykyk byizeka batu Deus hryrytsa zikyziknaha. <sup>10</sup> Kiristu ahatuk mynapykyrykyk zeka ihyrikoso pahapehaka iwa ihumo meky watu tsimoziknaha. Ahamysapybyitsa tu tsikykaranaha anahumo hi tsimyhyrikosokdanaha iwatsatu Deus hyrikoso humo myspitu tsimozikzonaha. Iwa Kiristu nikara. Kiristu mysapyzky nihyrikosokdaze Deus okzeka ahamysapyrêtsa tsimoziknaha, iwatsahi Deus hyrikoso humo myspitu tsimozikzonaha. <sup>11</sup> Deus hi Kiristu zihyryzikpowy. Deus hyrikoso ahatuk mynapykyryk zeka tsimyhyrikosokdanahaze ana humo kino niwatihi mynamyhyryzikpowy Sesus Kiristu wata. Iwa my ihyrikoso humo, atahi ahatuk mynapykyryk. Izikwy humo mynury ezytyk mozikzo tsimaha.

<sup>12</sup> O katukytsa hawa Deus hyrikoso mozihikik naha humo tahaktsa! Deus mymysapywyky iwatsahi mysapy-

byiwy tsimoewynaha. <sup>13</sup> Ikiahatsa ahabo zuba tsimynakaranaha zeka Deus tuk batu ahawahi tsimynapykyryknaha. Ikiahatsa hi ahape tu ahasopykze:

— Mysapybyitsa tu tsimykaranaha zeka Deus zikwy humo imysapybara tsimoewynaha — tsimaha. Iwaze Deus tuk ahawahi tsimynapykyryknaha. <sup>14</sup> Asaktsa Deus hyrikoso mysipehaka iharere bo zuba hyŷ mynakaranaha asahi Deus hyrytsa babatsa maha. <sup>15</sup> Deus hyrikoso inamykse. Ihyrikoso humo Deus myzo mozik, katsa ihyrytsa tsimoziknaha. Ana humo hi batu mypyby, batu ba, katsaktsa Deus pe mysopyk:

— O kazo ikia myzo babata — tsimykaranaha. Deus hyrikoso mytuk zeka iwa tsimytsasokonaha hŷ.

<sup>16</sup> Ihyrytsa babatsa tsimoziknahaze Deus pe:

— Myzo — tsimaha. Ihyrikoso atsatu mynakara. Atahi mype:

— Ikiahatsa Deus hyrytsa babatsa — mynakara. <sup>17</sup> Iwaze katsa Deus hyrytsa tsimoziknahaze Deus isapyrēnikia ty mybo nyny my ihyrikyky wata. Deus isapyrēnikia ty Kiristu bo botu nyny niy. Katsa kino niwatihi Kiristu tuk isapyrēnikia ty mybo nyny my. Abaka kytsa humo sinini tsimykaranaha, asaktsa Sesus harere bo batu hŷ zikaha mymysukyrykynaha. Aiba zuba Kiristu atsaesubaha mysipehaka katsa kino niwatihi itukytsa mysipehanaha, batu sininizo zikaha.

*Sesus Kiristu humo Deus tsizubarēna ty nizukni mymypywyky.*

<sup>18</sup> Katsaktsa mybarawy eze tu sinini tsimykaranaha. Aiba zuba mysapyrētsa tsimoziknaha hŷ. Batu amy tohi anawata hawa sinini tsiknakaranaha mopykbaik. Amy ty imysapynikia ty tsizubarēna ezytyk mozik. Iwatsahi batu paikpa mytsaty tsimahaktsa! <sup>19</sup> Tsizubarēna Deus nizukni ana hi aparakbaha taperyky. Deus hi:

— O asaktsa kahyrytsa. Asahi katse babata watsa — my. Ana harere hi tapery.

<sup>20</sup> Mybarawy Deus nizukni tisapyrēna my kytsa humo zuba zimiywy. Aiba zuba mybarawy ezytyk mozik. Taparakta Adão isopyksapybyita nikara ihumo hi mybarawy zimiywy. Deus hi mybarawy nizukni Adão imysapybara humo batu imysapy niyzik. Iwatsahi tsizubarēna Deus nizukni taperykynaha. Deus mybarawy ezytyk mozuknizo ana hi taperykynaha. <sup>21</sup> Katsaktsa Sesus Kiristu wata tsimoziknahaze mybarawy ezytyk mozik. Ba zikpyk isapyrēnikia mozik hỹ. <sup>22</sup> Abaka tsizubarēna Deus nizukni sinini mykara, batu ezytyk bara hi iwaha hi mybarawy wytyk watatsa, atatsahi tabykyhy piperykyze tsimyitsapyrētatsa. Itse mopurukze zuba tsakurētatsa mozik. Katsa kino niwatihi mybarawy ezytyk taperyky bykyze mykurētsa hỹ.

<sup>23</sup> Katsa niwatihi tsipiperykynaha. Deus myzo abaka katsa batu mymypykyhy, myraparētsa, myrapukrētsa imysapybara mytu mynapykyryk. Iwatsahi batu myku. Aiba zuba mykurētsa tsimoziknaha botu Deus mymysapywyky abaka Deus hyrikoso mytuk mynapykyryk atahi mymyhyrinomyryky. Atahi:

— Aiba zuba Sesus Kiristu wata tsimoziknaha. Deus ahasoho “asaktsa kahyrytsa babatsa” my. Ahanury ty ezytyk ty ahabo nyny my — Deus hyrikoso my. Mekywatu tsimoziknaha. Iwa mymyhyrinomyryky ana hi taperyky.

<sup>24</sup> Deus inamykse. Iharere bo hyỹ tsimykarannahaze inamykse ata humo hi meky watu tsimoziknaha ana humo hi myhyrinomyrētsa hỹ. Abaka meky watu tsimoziknaha, aiba zuba Kiristu wata tsimoziknaha ana humo hi mykubyrisorokrētsa. <sup>25</sup> Zikozo naha bara zuba taperyky. Iwatsahi makubyrisorokrētsa tu Deus isapyrēnikia ty taperyky.

<sup>26</sup> Mypunihikbyitsa tu Deus hyrikoso mytsyhyryze ibo mynapamykysoko. Katsakta mypetu mysopykze:

— Hawa sa Deus bo tsimypamykysokonaha. Amy sa ibo tsimyzapykynaha. Yh̃ ja — tsimaha. Iwaze Deus hyrikoso mytsyhyryze ibo mopamykysoko, katsakta Deus bo mopamykysonaha humo batu myhyrinomyry ana hi Deus bo mopamykysoko. <sup>27</sup> Deus koikny baktatu zinomyryba. Katsakta Deus hyrytsa tu ihyrikoso mytsyhyryze mopamykysoko. Mymykuburywy na humo kino inomyryba, amyty Deus mybo myzinyny tsihikik ihyrikoso tsihyrinomyrēta. <sup>28</sup> Amy skaraba mybo mykara ana humo hi Deus mymysapywyky, iwatawu batu imysapybara ty mykara ana humo kino Deus namysapywyky, katsakta Deus humo mymypoکزsirsirētsa h̃. Tubabatu Deus nimywatawyhik iwaze isoho bo hỹ tsimykaranaha. <sup>29</sup> Deus nanabyi ty tysuknihabyize hawatsa ihyrytsa moziknaha ana humo botu zinomyryba. Atahi:

— Kytsa sizubarētsa katse babata tukytsa moziknaha. Atahi taparakta. Asakta katse babata watsa moziknaha. Utakta kytsa sizubarētsa iwata mozihihikik — niy. Iwatsahi katsa ihyrytsa tsimoziknaha h̃. Iwa nizihikik.

<sup>30</sup> Asakta sakzohotsa ihyrytsa bo nisiwatawy. Siwatawyhytsa pe:

— Kaokzeka wasani tsimaha. Katse babata watsa tsimoziknaha. Katuk ahawahi tsimynapykyryknaha — my. Iwatsahi amy skaraba mybo mykara, ana kino mymysapywyky ihumo wasani my h̃.

*Deus Sesus Kiristu humo tsimypoکزsirsirēta.*

<sup>31</sup> Niwazubakta! Iwa mytsaty tsimykaranaha Deus isapyrēnikia ty tsizubarēna mybo nyny my. Iwatsahi hawa tsimytsasonaha. Deus zikwy hi mytuk mynapykyryk, iwatsahi aty zeka mymykniki Deus zikwy humo batu ziky.

<sup>32</sup> Deus hi tatse babata mybo zipaha mybarawy bo inasik. Mysapyzeken nihyrikosokda. Kytsa Kiristu zibezenhaze Deus yh̄y zuba niy, iwatahi Kiristu myhumo sinini nikara. Iwa niyze isapyrēnikia ty tsizubarēna mybo nyny mykara h̄y. <sup>33</sup> Deus watawyhytsa soho:

— Ikiahatsa kaokzeka ahamysapyrētsa — mykara. Iwatahi batu aty tohi iwatawyhytsa soho ba zikmysapybyiki. Deus zikwy humo siharere pyk niy.

<sup>34</sup> Batu aty tohi ba zikmyso:

— O ikiahatsakta ahamysapybyitsa tu tsikykaranaha ana humo hi tsimyhyrikosokdanaha zeka wasani — my. Kiristu nawa mybo batu tyso. Atakta mysapyzeken nihyrikosokda, iwatsahi mysapybyitsa tu tsikykaranaha ty batu tywabyzo h̄y. Deus zihyrikpowy iwaze ituk tawahi mynapykyryk. Myhumo tsiharereziurēta, Deus bo mytsyhyryze mynapamykysoikik, iwaze Kiristu myhumo tsimypokzitsiarēta h̄y. Iwatsahi batu aty tohi ahamysapybyitsa tu tsikykaranaha humo tsimyhyrikosokdanaha zeka wasani my.

<sup>35</sup> Kiristu mymysapywyikik h̄y. Amy skaraba mybo mykara Kiristu myhumo tsimypokzitsiukrēta. Tozeka ja kytsa Kiristu harere bo batu h̄y zikaha mymyit-sapyriwynaha. Mymymyijaikiknaha. Sihumo sinini tsimykaranaha. Myraparētsa. Mynamybyikitsa. Asiba tsimyhyrikosokdanaha simypybytyrētsa pokso. Mymybanaha. Iwa mybo mykaranaha zeka iwatahu Kiristu myhumo tsimypokzitsiukrēta. Katsakta:

— O Kiristu myhumo tsimypokzitsiukrēta h̄y — tsimykaranaha. Iwatsatu Deus tyryktsa sinini ziknakaranaha. <sup>36</sup> Deus harere papeu humo botu ziwataha:

— O Deus pibytuhukutu kytsa sakyriukrēnikitsa mymybakyzykynaha,



kytsa mymysukyryikiknaha.

Katsa hozipyrykzatsa watsa tsimaha.

Hawa kytsa hozipyrykzatsa mysibanahatsa watsa  
kytsa mymybakzykynaha.

Iwa mymysukyrykynaha — niy.

Ana kino botu ziwataha. Deus harere papeu humo ityryk-  
tsa soho ziwatahanaha.

<sup>37</sup> Amy skaraba namysapybyrikinahaze Deus hyrikoso  
humo mypunihikrētsa tsimoziknaha. Kiristu myhumo  
tsimypokzitsiukrēta iwatsahi meky watu tsimoziknaha  
hỹ. Izikwy humo mypunihikrētsa tsimoziknaha.

<sup>38</sup> Deus mymysapywyky hỹ. Atahi myhumo tsimypokz-  
itsiukrēta. Tsimyhyrizikosokzanaha zeka myhumo tsimy-  
pokzitsiukrēta. Myspituze myhumo tsimypokzitsiukrēta.  
Bijoikpe iknyktsa sipehatsitsa abazubatsa sizubarētsa ni-  
watihi bijoikpe eze tu iwa Deus mymysapywyky ba zikpyk.  
Abaka amy ty mybo mykara byriri kino niwatihi amy ty  
mybo mykara, Deus mymysapywyikik ba zikpyk. Deus  
tawahi mymysapywyky hỹ.

<sup>39</sup> Batu amy tohi mybarawy bijoikpe ba mekytu ziky  
Deus zuba mymysapywyikik ba zikpyk. Pihik humo kino  
niwatihi ba mekytu ziky Deus zuba mymysapywyikik ba  
zikpyk. Deus tsizubarēna nizukni iwatahi batu amy tohi  
ba mekytu ziky Deus zuba mymysapywyikik ba zikpyk.  
Deus myhumo tsimypokzitsiukrēta babata. Katsaktsa  
Sesus harere bo hyỹ tsimykarannahaze iwatahi mymysapy-  
wyikik. Katsaktsa Sesus tuk estuba zubata wata iwaze  
Deus tatse bo iktsa mynakaraze katsa kino niwatihi mybo  
iktsa mynakara iwatahi mymysapywyikik. Iwatahi batu  
amy tohi ba mekytu ziky Deus myhumo tsimypokzit-  
siukrēta ba zikpyk.

## 9

*Deus myhumo tsimypokzitsiarēta* ana tyhi katukytsa mysihyrinymyryky. Aba Sesus harere bo batu hỹ nikananaha.

<sup>1-2</sup> Kyze utakta batu kaku. Katukytsa pokzi kasukat-sihikrēta hỹ. Sudeutsa humo mopuziuku batu pyk icy. Wasani motsasoko. Sesus harere bo hỹ mykara iwatahi batu mybarapetu kasopyk. Deus hyrikoso katuk mynapykyryk iwatahi batu kamyspihikbata. Iwatatu ahape:

— Sudeutsa humo kamypokzitsiarēta — my. Kaharere wasani mykara. <sup>3</sup> O katukytsa pahatsumuēhĩ tsihikik iwatahi Deus pe:

— O kazo katukytsa humo kamypokzitsiarēta sipokzi utakta Kiristu tuk batu mynapykyrykyzyky iwa zeka sisapyzeyky sinini mykara — my. Ana harere hi ba ziksitsumuēhĩ. <sup>4-5</sup> Katukytsa Sudeutsa taparakta Isareu tsekokatsa tsimaha. Tubabatu Deus taparaktsa mydiritsa nisiwatawy. Abarão iwaze itse Isake inarokota iwaze Sako Isake tse iwatsa nisiwatawy. Asaktsa ityryktsa niyziknaha. Sibō hi Deus tazikwy ziwatawy. Ispe niy:

— Isapyrēnikia ty ahabo nyny mykara. Ahahudikhudikwy ty ahabo nyny mykara. Ahatsekokatsa sizubarētsa mynaubaranaha — niy. Aiba zuba iharere mypehatsa Moises bo nitsasoko, iwaze hawa sisopyk mykaranaha sihyrinymyrētsa. Nawa Deus harere mysihyrinymyry mykaranaha zetu. Deus hi:

— Taparaktsa ahadiritsa Abarão, Isake, Sako iwatsa sihyrytsa ahatukytsa niyziknaha. Estuba zuba ahatsekokatsa tuk kapehata mozik, atahi kabo pahaoktyhyryk — niy. Kiristu Deus zipehata mybarawy bo inasikze Sudeu niyzik. Atakta imysapyrēnikita tu iwata humo hi katsa:

— O ikia zuba amyharerewabyrēnikita tsimaha hỹ. Ikie zuba tsamysapyrēta tsimykaranaha. Ihumo kytsa

sizubarëtsa Deus bo mykaranahaktsa! “O Deus ikia zuba amysapyrënikita” — mykaranaha. Iwa Deus Sudeutsa nisiwatawy.

<sup>6</sup>Hawa ha ty Deus nitsasoko atsa tu ty mykara. Iwatsahi batu tyso:

— Deus harere batu wasani. Sudeutsa sizubabyitsa zuba Deus harere bo hyÿ mykaranaha, iwatsahi Deus humo batu siwatahawyhÿ — iwa batu tyso. Taparakta Isareu tsekokatsa sizubarëtsa, Deus situk sizubabyitsa tu nisiwatawy ihyrytsa niyziknaha, usts kytza kino niwatihi Deus nisiwatawy iwaze ihyrytsa niyziknaha. <sup>7-9</sup>Abarão mydiri itsekokatsa sizubarëtsa. Deus okzeka batu sizuba itsekokatsa babatsa zuba Deus tyryktsa niyziknaha. Deus okzeka asaktsa Isake humoktsa Abarão tsekokatsa babatsa zuba, Deus tyryktsa niyziknaha. Tapara Deus Abarão pe niy:

— Usta mytyktseheze aoke Sara tabykyhy aibaeze zuba atse mopuruk hÿ — niy. Iwa Deus Abarão pe niy, iharere wasani niy. Abarão tse nipuruk, iwatsahi Abarão tsekokatsa sizubarëtsa tuze sizubabyitsa zuba Deus nisiwatawy ihyrytsa niyziknaha.

<sup>10</sup>Abarão tse Isake soho bo mytsaty tsimykaranaha. Deus Isake oke Hebeka bo nitsaso. Ana humo kino pahayrinymyry Deus sizubabyitsa zuba nisiwatawy. Atatsa hi beketsa ty tabykyhyze iwaze beketsa nisipupuruk. Taparakta Isake hyrytsa niaha. Tapara nipurukta izo Esau zinaropyk, ibete tatu nipurukta izo Sako zinaropyk iwatsa. <sup>11-12</sup>Tapara beketsa nipupuruknahaze Deus tihi:

— Iykykybyita humo kamypokzitsiarëta. Taparakta taypykze iykykybyita batu iakzoho. Iykykybyita tsyhyryze tarabaja my — niy. Iwa Deus niy. Tapara sipupurukbyize asahi naka tisapyrëna iwaze naka mysapybara ahabyitsa tu mykaranaha. Tapara sipupurukbyize tu Deus

estuba ziwatawyhik, iwa nizihikik hỹ iwatahi iykpykbyita ziwatawy. Hawa nikaranaha ana humo hi batu ziwatawy, estuba zuba ziwatawy iwa nizihikik. <sup>13</sup> Deus harere papeu humo:

— Sako tsekokatsa nisiwatawy iky. Esau tsekokatsaksa batu — niy. Iwatsahi Hebeka beketsa humo Deus soho tsinymyrykynaha.

<sup>14</sup> Aty ja:

— Estuba zubata Deus ziwatawy iwa batu wasani my — maha. Nawa motsasokonahaze batu imysapy my. <sup>15</sup> Tubabatu Deus Moises pe niy:

— Aty humo zeka kamypokzitsiukrēta ata humo hi kamypokzitsiukrēta. Aty humo hi kamyzehikik zeka ihumo kamypokzitsiarēta hỹ — niy. <sup>16</sup> Iwatahi amy ty sa tsimyzihihiknaha Deus batu ziky ana humo mymywatawy. Amy ty sa tsipisapywykynaha Deus batu ziky ana humo mymywatawy. Deus myhumo tsimypokzitsiukrēta iwa myzehikik. Hawa mozihikik naha humo zuba nimysapywyky. Iwa hỹ. <sup>17</sup> Deus harere papeu humo iwatahaha, Deus Parao kytsa pehakatsa pe niy:

— Uta kahumo kytsa sipehatsa tsikyzyk. Kytsa sizubarētsa tsiksipeha, kabo batu hỹ ziky. Kazikwy ty abo ziwatawy, iwatahi ikia humo kytsa sizubarētsa kasoho humo sihyrinymyrētsa. Utakta abazubata hi ba hawa tohi ziksukninaha ana ty hi zinymyrykynaha — niy. Iwa Deus harere papeu humo iwatahaha. <sup>18</sup> Iwatahi asaktsa Deus iakparawy sihumo tsimypokzitsiarēta. Asaktsa iharere bo batu hỹ zikaha. Iwatsa batu ma zikaha.

*Hawa Deus tatyryktsa tuk nikara.*

<sup>19</sup> Deus nawa zeka aty ja kape my:

— Aty Deus harere bo yhỹ ahabyizeka iwaze Deus sinini ykarawy bo myzipeha zeka batu wasani my. Deus

mozihikik ba hawa tohi zikaha tu atakta sinini ykarawy bo myzipeha zeka batu wasani my — tsimy.

<sup>20</sup> — O kaharereziwy iwa Deus bo batu tyso. Apetu ja asopyk. “Utakta myhyrizikwanita tuze iwaze Deus pisapybyiki.” Iwa batu tyso. Katsakta morosuk watsa batu ipokzitsi. Morosuk mozukni nahaze batu harere zeky “Iwa tsimyzuknikize batu wasani my” my. Iwa morosuk tsihitsa bo batu tyso my. Katsa kino niwatihi Deus pe iwa batu wasani my — iwa batu tyso.

<sup>21</sup> — Aty zeka morosuk mozuknize hawa mozihikik nahawa mozokniki. Aitsekni tsizubarēna zeka petok morosuktsa mysisukni. Estuba tisapyrēta mozik ustakta isapybyita eze natapatsikik tawahoro eze zuba mynakara.

<sup>22-24</sup> Hawa Deus niy morosuk tsihitsa wata Deus Sudeutsa humo tsimypokzitsiarēta. Asakta iharere bo batu hỹ mykaranaha tazikwy ziwatawy. Asakta iharere bo batu hỹ mykaranaha iwatahi taokaniki. Ba zik tatsapusare, asakta iharere bo batu hỹ mykaranahaze ba zik simyitsapyriwy. Tsiakubyrisorokrēta ustsya kytša kino nisiwatawy. Iwa myze Sudeutsa asakta iharere bo batu hỹ mykaranaha ba zik simyitsapyriwy. Katsakta ihyrytsa tsimoziknaha, asakta nisiwatawy. Wastuhu Sudeutsa ahamysapyrētsa tsimoziknaha ana humo hi nimywatawy. Ustsya Sudeutsabyitsa kytša sizubarētsa ihyrytsa tsimoziknaha, sizubarētsa nisiwatawy. — Deus tapetu nikara:

— Asakta katse babata harere bo hỹ mykaranaha iwata simysapyrētsa moziknaha. Asahi: “O Deus myzo ikia zuba amysapyrēnikita, ikia zuba apunihikrēnikita” maha. Iwa kabo mosakibazikiknaha — niy. Iwa sihumo tsimypokzitsiarēta hỹ. <sup>25</sup> Tubabatu Hosea Deus sohokotsa Deus harere papeu humo ziwatahaka:

— Taparaka asakta kahyrytsabyitsa tu

abaka mysipeha “O katyryktsa tsimaha”  
pahawatawy iwatsahi katyryktsa tsimoziknaha.  
Tapara asa humo batu kakparawy abaka ispe my:  
“Ahahumo kamypokzitsiukrēta” my – niy.

<sup>26</sup> Haneze Deus tihi:

— Ikiahatsa katyrytsabyitsa tsimaha.

Kyze anaeze ispe sopyk: “kahyrytsa tsimaha” my.  
Deus koikny baktatu asahi kahyrytsa tsimoziknaha — niy.  
Iwa botu Hosea ziwatahaka. Sudeutsabyitsa soho, hawa  
asa kino niwatihi Deus hyrytsa moziknaha.

<sup>27-28</sup> Isaijas Deus sohokotsa niwatihi nikara Deus harere  
papeu humo botu ziwatahaka:

— Taparakta Isareu tsekokatsa sizubarētsa niobaranaha  
nimyra watsa maha.

Deus situk sizubabyitsa tu mysiwatawy.

Sizubarētsa asaktsa Deus harere bo batu hỹ zikaha  
mybarawy eze mysimyitsapyriwyky.

Batu imysapy tsimykaranaha zeka pahasininiwy — niy.  
Nawa botu nitsaso atsa tu mykara. <sup>29</sup> Tubabatu taparakta  
Isaijas Deus harere papeu humo ziwatahaka:

— Deus mybarawytsa ba hawa tohi zikzukninaha.

Wastuhu mytukytsa nitarenaha niwa byizeka,  
katsaktsa Sodoma ezektsa watsa,  
asahi tahamysapybara humo niakbabaiknaha  
katsa kino niwatihi tsimokbanahatsa.

Komora ezektsa watsa niwatihi tsimokbanahatsa.  
Sudeutsa batu sizuba Deus bo mysioktyhyryk — niy.  
Iwa Deus harere papeu humo botu ziwataha.

*Deus wasania ty bo Sudeutsa batu hỹ nikaranaha.*

<sup>30</sup> Sudeutsabyitsa batu tahapetu sisopyk:

— Amy ty tsimykaranaha iwatsa tu Deus okzeka mys-  
apyrētsa tsimoziknaha — iwa batu tyso. Asaktsa Sesus  
harere bo hỹ mykaranaha ana humo hi Deus tihi:

— Kaokzeka wasani tsimaha katse harere bo hỹ tsimykaranaha iwatsahi ahaspirikporëtsa tsimypykyryknaha — niy. <sup>31</sup> Sudeutsa tihi:

— O katsaktsa Deus sopykwy ty tsimykaranaha iwatahi Deus mymypeha: “Ikiahatsa ahamysapyrëtsa” my — mytsaty ahabyitsa nikaranaha. Deus sisoho:

— Ikiahatsa ahamysapyrëtsa — iwa batu tyso. Niwazuba iharere bo zuba batu h̃y zikaha, iwatsahi Deus harere bo batu h̃y mahaze Deus okzeka batu wasani zikaha. <sup>32</sup> Deus harere bo batu h̃y mahaze hawa wasani mykaranaha ana humo hi tapetu sisopyk Deus mype niy:

— O kaokzeka ahamysapyrëtsa — iwa mytsaty ahabyitsa nikaranaha. Deus okzeka ata harere bo hi hỹ mykaranaha ana kino aba zuba my. Sesus Kiristu harere bo batu h̃y mahaze iwatahi Deus ispe my:

— Kaokzeka batu ahamysapy — niy. <sup>33</sup> Iwatahi Deus harere papeu humo:

— O kytsa mytsatziutahaktsa! Harahare wataty zik iky.

Ata humo hi Sudeutsa inarahanaha.

Kiristu hi harahare wata, asaktsa iharere bo hỹ mykaranaha batu sisikpyby

tahawahi Deus tuk mynapykyryknaha — niy.

Deus harere papeu humo niy.

— Asaktsa Sesus Kiristu harere bo batu h̃y maha asaktsa kytsa watsa asahi harahare bete inarahanaha.

Iwatsahi Sudeutsa Sesus Kiristu harere bo batu h̃y mykaranahaze

Kiristu sihumo harahare wata mozik,

iharere bo batu h̃y zikaha iharere batu siakparawy

iwatsahi kytsa watsa harahare bete inarahanaha

Iwa Deus harere papeu humo niy, hawa Sudeutsa sizubabyitsa Deus hyrytsa moziknaha.

## 10

<sup>1</sup> O kytsa! Deus katukytsa sihumo kamypokzitsiarëta mysitsumuëhĩ tsihikik. Deus bo mopamykysoikik:

— O myzo katukytsa tysitsumuëhĩkĩkta! Tysioktyhyk — my. <sup>2</sup> Deus mozihihik ana humo hi pitsihikiknaha zuba batu zikaha. Sispirikpobyitsa tuze Deus okzeka wasani ha humo batu sihyrinomyry. <sup>3</sup> Hawa mytsaty mykaranaha ana humo ka nikaranaha. Ana ty hi Deus okzeka wasani ja mykaranaha iwa tahapetu sisopyk. Sispirikpobyitsa tu paikpa mytsaty wasani ja mynakaranaha iwatsa tu mybarapetu sisopyk. Sesus harere bo hỹ tsimykaranaha zeka iwatsahi Deus okzeka mysapyrëtsa tsimoziknaha ana ty hi batu h̃y zikaha.

<sup>4</sup> Kiristu zumuze Deus harere ibyky ana hi Moises ziwataha nepykbaik. Abaka Kiristu harere bo hỹ tsimykaranaha zeka iwaze Deus okze mysapyrëtsa tsimoziknaha. Ana humo hi Sudeutsa batu h̃y zikaha.

*Deus myzubarëtsa* nimywatawy iwatahi Sesus ibo mys-ioktyhyryk tsihikik.

<sup>5</sup> Tubabatu Moises ziwatahaka, kytsa soho asahi isopykwy bo hỹ nikaranaha. Asa soho ziwatahaze:

— Ikiahatsa Deus harere ibyky Moises ziwataha tsizubarëna bo hỹ tsimykaranaha zeka iwaze Deus okze ka wasani tsimyzurukunaha, ahawahi ituk tsimynapykyryknaha. Iharere humo estuba zuba yh̃y ahabyi zeka batu wasani tsimyzurukunaha iwatsahi Deus tuk ba ziknapykyryk. Iwa Moises sopykwy bo yh̃y batu zikaha — niy. <sup>6</sup> Deus hi:

— Sesus Kiristu harere bo hỹ tsimykaranaha zeka ahamysapyrëtsa tsimoziknaha iwa kaokze ka wasani tsimaha — niy. Wastuhu ahatuktsa:



— Batu zikaha! Batu aty tohi bijoikpe bo iwaze Kiristu ba zikziokty. <sup>7</sup> Batu aty tohi siakbatsa sapy bo iwaze Kiristu mybarawy bo ba zikzioktyhyryk. Katsa iwa batu zikaha.

Kiristu botu mybarawy bo inasik, mysapyzeken botu nihyrikosokda. Atahi mytuk mynapykyryk. <sup>8</sup> Deus harere papeu humo botu ziwatahaka:

— Kaharere bo hyĩ tsimykaranaha zeka kaokzeka ahamysapyrētsa tsimoziknaha. — Anaharere humo kino:

— Kaharere bo hyĩ tynakaranahaktsa! Ana kino botu tsiwabynaha. Ana humo kino botu mytsaty tsikykaranaha — niy. Iwaze ahabo tihi:

— Kiristu harere bo hyĩ tahaktsa! — my. Kaharere awa tu ahabo motsasokozo. <sup>9</sup> Kytsa aparakbaha bo ikiahatsa tihi:

— Sesus Kiristu mypehakatsa — tsimaha. Ana harere tsimytsasokonaha zeka Deus pahabetesaka. Deus Kiristu zihyrikpowy ata harere bo hyĩ tsimaha zeka Deus pahabetesaka hỹ, iwa Deus bo pahaoktyhyryk. <sup>10</sup> Katsaktsa Sesus harere bo hyĩ tsimykaranahaze Deus mype niy:

— Kaokze ka Kiristu humo ahamysapyrētsa tsimoziknaha — my. Tsimytsasokonaha zeka Sesus Kiristu mypehakatsa my iwazeka Deus mobetesaka, mymysapyrētsa tsimoziknaha. <sup>11</sup> Deus harere papeu humo iwatahaha:

— Aty zeka Sesus harere bo hyĩ mykara atakta batu sikpyby ihumo tspirikporēta mozik — niy. <sup>12</sup> Kytsa sizubarētsa iharere bo hyĩ mykaranaha tsahi batu sisikpyby. Sudeutsa Sudeutsabyitsa kino niwatihi asaktsa Deus okzeka astsabani maha. Sizubarētsa Sesus humo sispirikporētsa moziknaha. Asahi:

— Ikia zuba mypehakatsa — mykaranaha. <sup>13</sup> Deus harere papeu humo iwatahaha:

— Aty zeka Deus bo myzapykyky zeka: “O tsipik-tsumuēhĩ” atahi Deus piwaby tahi pioktyhyryk, kytsa sizubarētsa Deus bo mysiooktyhyryk — niy.

<sup>14</sup> Iharere mywaby byizeka batu Deus pe:

— O tsipiktsumuēhĩ — Deus wasania ty tywaby ahabyizeka batu iharere bo yhỹ tsikaha. Ustakta Deus wasania ty tyso byizeka ba ziwabynaha. <sup>15</sup> Deus ykzohotsa sipeha ahabyizeka iharere ba ziktsasonaha. Deus harere papeu humo iwatahaha:

— Deus ykzohotsa humo mozumukunaha, iwaze wasania ty motsasokonaha ana humo hi mykurētsa hỹ — niy.

<sup>16</sup> Iwaze — Deus wasania ty nitsasokonahaze sizubabyitsa tu iharere bo hyỹ — nikaranaha. Iwa tubabatu Deus sohokotsa Isaijas botu ziwatahaka. <sup>17</sup> Kytsa Deus wasania ty piwabykynahaze iwaze zuba asaktsa iharere bo hyỹ mykaranaha. Iwaze ana harere humo sispirikporētsa moziknaha. Kiristu soho piwabykynahaze iharere bo hyỹ mykaranaha iwatsahi ihumo sispirikporētsa moziknaha.

<sup>18</sup> Kyze aty zeka:

— Sudeutsa Sesus harere bo batu hỹ mykaranaha. Tozeka ja Deus wasania ty batu waby. Batu ba, Deus wasania ty ziwabykynaha hỹ. Deus harere papeu humo iwatahaha:

Nanabyitaba kytsa sizubarētsa Deus soho humo sihyrinymyrētsa niapykyryknaha.

Mybarawy ezektsa sizubarētsa hudikhudikwy ezektsa iwatsa siharere ziwabynaha — niy.

Iwa Deus harere papeu humo iwatahaha.

<sup>19</sup> Aty zeka ja:

— Isareu tyryktsa sihyrinymyrybyitsa watsa — my. Batu ba. Sihyrinymyrētsa hi. Kiristu soho sihumo batu ihokdaha. Taparakta Moises Deus tsyhyryze tihi:

— Ikiahatsa Sudeutsa tsimaha.

Deus ustsá kytsa mysiwatawyze sihumo ahazokdi-  
harëtsa tsimoziknaha.

“Katsa zuba Deus hyrytsa” tsimykaranaha paikpa mytsaty  
tsimykaranaha

iwatsahi Sudeutsabyitsa asaktsa sihyrinymyrybyitsa  
tu mysiwatawyze

iwaze sihumo ahazokdiharëtsa tsimoziknaha — niy.

Iwa Deus harere papeu humo botu iwatahaha.

<sup>20</sup> Taparakta Isaijas Deus sohokotsa isikybybyitatu  
Deus tsyhyryze:

— Asaktsa katy beri ahabyitsa iwatahi sibo kahazuba iky,  
asaktsa batu katy sapyky ahabyitsa tu sibo utatu  
ikwatawy — niy.

Iwa tubabatu taparakta Isaijas ziwatahaka.

<sup>21</sup> Isaijas Sudeutsa soho kino niwatihi ziwatahaka Deus  
tsyhyryze tihi:

— Pibytuhukunaha tu kaharere bo hyÿ tsimahaktsa  
kytsa! mykara.

Ikiahatsa batu. Kaharere bo batu yhyÿ tsikykaranaha  
— niy.

Iwa Isaijas niy.

## 11

*Deus tatyryktsa Sudeutsa humo tsimypokzitsiarëta.*

<sup>1</sup> Iwaze hawa skaraba my:

— Deus tatyryktsa Sudeutsa nisimoewy ja — my. Batu  
ba. Deus tatyryktsa Sudeutsa ba ziksimoewy. Uta hiba  
Isareu ezekta tu. Taparakta Abarão kadiri, utakta Bëсами  
tukytsa iknyta. Deus ba zikmoewy. <sup>2</sup> Deus isuknihybyze  
Sudeutsa nisiwatawy iwatahi tatyryktsa ba ziksimoewy.  
Taparakta Erias Sudeutsa soho Deus bo zisapybyriki, ana  
harere Deus papeu humo ziwatahaka ana humo tsikspirik-  
tsokdanaha ja. <sup>3</sup> Deus sohokotsa Erias tihi:

— “O Deus sohokotsa nisibabaiknaha. Asapy haneze siraratsa wezowytsa zipaparabaiknaha hana bo ja isapy zuba. Uta zuba iktare. Asahi pikbeze tsihikiknaha” mytsaty ahabyitatu ikykara — niy. <sup>4</sup> Hawa Deus Erias pe niy:

— O batu, ikia zuba kaharere bo hyÿ tsimykara batu ba. Kytsa sizubarëtsa sete miutsa sipunihikrëtsa asa kino niwatihi deusbyitsa Bara inarokota iharere bo batu hÿ nikaranaha. Asahi kaharere bo hyÿ mykaranaha. Utsa kytsa zuba Bara ikia deus my mytsaty ahabyitsa nikaranaha — niy. Iwa Deus Erias pe niy.

<sup>5</sup> Abaka Sudeutsa wastuhu kytsa Sesus harere bo hyÿ mykaranaha. Tubabatu Erias okze tuze wastuhu kytsa Deus harere bo hyÿ nikaranaha aba kino niwatihi Deus Isareu tsekokatsa nisiwatawy, sihumo tsimypokzitsiukrëta iwatahi nisiwatawy. <sup>6</sup> Asaktsa taparaktsa sopykwy bo yhÿ nikaranaha iwaha humo Deus batu isty watawy. Moises harere bo yhÿ nikaranaha iwa zikzurukunaha ana humo hi batu isty watawy. Batu ba. Sihumo tsimypokzitsiarëta ana humo hi nisiwatawy. Deus nisiwatawy zeka taparaktsa sopykwy humo zuba zikzurukunaha, iwa zeka sihumo batu imypokzitsi.

<sup>7</sup> Niwazuba amy ty Isareu ezektsa ziberikinahaze ana hi batu ity kaha. Deus okzeka simysapyrëtsa niyzik tsihikiknaha batu simysapybyitsa tu nikaranaha. Batu sizuba Deus okzeka simysapyrëtsa niyziknaha asaktsa botu nisiwatawy. Hawa Deus okzeka kytsa simysapyrëtsa moziknaha ana hi wastuhu Isareu ezektsa piwaby tsihikiknaha. Utsaktsa Sesus harere humo batu sispirikpo iharere bo batu hyÿ zikaha. Iwaze Deus tihi:

— Ikiahatsa kaharere bo batu hÿ tsimykaranaha — niy.

<sup>8</sup> Deus harere papeu humo sisoho ziwatahaka:

— Deus harere ziwabynahaze sibo tsihokdaharëna.

Simytsatyhybyitsa tu iharere humo batu  
sihyrinymyry.

Aba kino atsawatu iharere batu siwabyziu — niy.

<sup>9</sup> Taparakta Dawi niwatihi Deus harere papeu humo  
sisoho ziwatahaka:

— Asaktsa tahapetu sisopyk mybarapetu mykaranaha.

Simyspihikbatanikitsa Deus mysizukutu iwaze  
wasani my.

Tahamyikaha burukze mahape myijaikiknaha mybara-  
petu mykaranaha.

Hawa sasabyitsa tahawerekywy bo mynapupuna-  
haze tawata tahamyikaha pimyikinaha.

<sup>10</sup> Sihyrizikubyitsa watsa mozurukunaha.

Deus batu mynyhy mykaranaha.

Asaktsa maku wata titsakyrikrēta piskyrik eze tawata  
mozurukunaha.

Deus mysitsumuēhī tshikik asaktsa ipe: “O batu hỹ”  
mykaranaha

Iwa Deus harere papeu humo ziwatahaka.

<sup>11</sup> Iwaze Sudeutsa zimyikinahaze simysapybyitsa tu  
nikaranahaze jokboha zuba zimyikinaha. Sudeutsa myt-  
satyspyk mykaranaha. Sudeutsa Deus harere bo batu  
hỹ nikaranahaze iwaze Deus Sudeutsabyitsa nisibetesaka.  
Sudeutsabyitsa Deus bo mysioktyhyrykze Sudeutsa si-  
humo sizokdirētsa niyziknaha. Abaka Sudeutsabyitsa  
Deus bo mysioktyhyryk ana humo hi sozeka ja Sudeutsa  
tahi:

— Katsa tihiktsa kytsa! Katsaktsa Deus bo tymyokty-  
hyryknahaktsa! Sudeutsabyitsa watsa — mykaranaha.

<sup>12</sup> Sudeutsa Sesus harere bo batu hỹ nikaranahaze Deus  
Sudeutsabyitsa tabo mysioktyhyryk. Sudeutsa iharere bo  
batu hỹ mykaranaha. Iwatsahi Sudeutsabyitsa iharere  
bo hỹ mykaranaha ihumo sispirikporētsa moziknaha.

Deus nisisapywky aiba zuba Sudeutsa Sesus harere bo hyÿ mykaranahaze Deus isapyrënikia ty myzubatsa bo nyny my hÿ.

*Sesus Kiristu Sudeutsabyitsa Deus bo mysioktyhyryk.*

<sup>13</sup> Abaka Sudeutsabyitsa zuba motsasoko. Deus zikpeha my. Wasaniha ty ahabo motsasoko ana humo hi zikpeha. Kahyrikosokzawy humo kakurëta mynapykyryk.

<sup>14</sup> — Tozeka ja kahyrikosokzawy humo katukytsa Sudeutsa ahamo sizokdirëtsa moziknaha iwaze situk wastuhu kytsa Deus bo mysioktyhyryk. Tozeka ja iki-ahatsa bo iktsa mahaze “O katsaktsa niwatihiktsa” — maha <sup>15</sup> Sudeutsa Sesus harere bo batu hÿ nikaranahaze sizubarëtsa Sudeutsabyitsa humo ka wasani niy. Sudeutsabyitsa Deus harereziuwyttsa niyziknaha. Deus Sudeutsa mysiwatawyzoze kytsa sizubarëtsa bo tisapyrëna hÿ. Sudeutsa iharere bo hyÿ mykaranahaze myzubatsa humo tisapyrëna. Sizubarëtsa bo pisapywyky hÿ. Aty zeka inahyrizikpo zeka tisapyrëna my nawata, Deus myzubatsa mysisapywyky hÿ.

<sup>16</sup> Atsikara estuba zuba Deus bo nyny my zeka nitare naha kino niwatihi wasani. Hwiharatatsa sisapyrëtsa zeka isarapatsa kino niwatihi sisapyrëtsa anahumo hi ahahyrinymyrëtsa. Taparaktsa Deus harere bo hyÿ nikaranaha sihumo tsimypokzitsiukrëta. Aba kino niwatihi kytsa iharere bo hyÿ mykaranaha sihumo tsimypokzitsiukrëta hÿ.

<sup>17</sup> Oriwereja soho bo mytsaty tsimaha, ihumo tsinymyrykynaha. Oriwereja wastuhu sarapatsa niakaraknaha. Kyze hwisarapatsa jakara iknykta mekta sarapa tu tasutsuk tsikykaranaha, aibani zuba tahappyknaha. Iwata Sudeutsa hwisarapatsa watsa asaktsa sikakarehetsa niaha. Sesus harere bo batu hÿ mykaranahaze tu Deus hyrytsa batu zikyziknaha iwatsahi

metutu tahasapynaha. Ikiahatsa Sudeutsabyitsa tu Sesus harere bo hyĩ tsimykarannahaze iwatsahi ihumo ahaspirikporētsa tsimoziknaha, iwatsahi ikiahatsa hwisarapatsa watsa asaktsa jakara iknykta hwi humo nezutsukuk niy. <sup>18</sup> Iharatatsa humo hwi taypyk. Batu sarapatsa humo hwi taypyk. Iwatsahi pykyhytutaha nawa tsimytsasokonaha. Batu tyso.

— O Deus Sudeutsa batu iakparawy iwatahi katsa zuba tsikmywatawy — iwa batu tyso.

<sup>19</sup> Ikiahatsa:

— Hawa katsa hwisarapatsa jakara iknykta hwi humo nezutsuk tsimaha, Deus Sudeutsa sapy mybo nyny mykara — tsimaha. <sup>20</sup> Wasape tsimytsasokonaha wasape my. Sudeutsa hwisarapatsa sikakarehetsa watsa Sesus harere bo batu hĩ zikaha. Ikiahatsa hi sisapy tsiptaksenaha. Sesus harere bo hyĩ tsimykarannahaze ana humo hi sisapy tsiptaksenaha. Pykyhytutaha kytsa! Batu tyso:

— Katsa zuba Deus hyrytsa tsimaha — iwa batu tyso. Pykyhytutaha! Sesus harere bo zuba hyĩ tsimykarannahaktsa batu pyk zikaha! <sup>21</sup> Sudeutsa Sesus harere bo batu yhĩ mykarannahaze iwatahi Deus metutu nisisapyspyk niy. Hwisarapatsa sikakarehetsa watsa. Iwatuze Sudeutsa hwisarapatsa babatsa watsa. Ikiahatsa ja. Ikiahatsa iharere bo yhĩ ahabyizeka pahatyryktsapyriwy. <sup>22</sup> Iwaze tsiwabytoktonaha! Sudeutsa Sesus harere bo batu hĩ mykarannahaze iwaze Deus nisityryktsapyriwyky. Katsa tihi:

— O hawa Deus mykara wasani my — tsimaha. Deus Sudeutsabyitsa Sesus harere bo hyĩ mykarannahaze tu asa humo tsimypokzitsiukrēta hĩ. Katsa tihi:

— O hawa Deus mykara wasani my — tsimaha. O kytsa pykyhytutaha! Sesus harere bo yhĩ ahabyizeka ikiahatsa hwisarapatsa watsa tsimoziknaha, asaktsa sikakarehetsa watsa niaha. <sup>23</sup> Sudeutsa Sesus harere bo batu hĩ niahaze

hwisarapatsa watsa niyziknaha asaktsa sikakareheta hỹ niaha. Aiba zuba Sesus harere bo hyỹ mykaranaha iwatsahi ihumo sispirikporẽtsa moziknaha iwaze Deus hyrytsa mozikzonaha. Ana kino Deus zikwy humo batu ihokdaha.

<sup>24</sup> Iwaze ikiahatsa Sudeutsabyitsa hwisarapatsa watsa jakara iknykta niaha, iwaze oriwereja hwi humo nezutsuk niy. Tapara ikiahatsa Deus hyrytsa yrik ahabyize. Abaka iharere bo hyỹ tsimykaranaha tsahi ihyrytsa tsimoziknaha. Sudeutsa iharere bo hyỹ maha zeka ihyrytsa mozikzonaha. Hawa hwisarapatsa hwi humo nezutsukze, Sudeutsa oriwereja sarapatsa watsa Deus hyrytsa mozikzonaha. Iharere bo hyỹ maha zeka ihyrytsa mozikzonaha. Ana kino Deus zikwy humo batu ihokdaha.

*Deus myzubatsa humo mysisapywyky.*

<sup>25</sup> O katukytsa pahahyrinymyry tsihikik Sudeutsa Kiristu harere bo batu hỹ mahaze tahaoktsĩspyknaha maha. Asaktsa Deus bo batu tyso mynakaranaha:

— O katsaktsa Sesus Kiristu harere bo batu hỹ tsimaha iwa batu hỹ tsimaha — maha. Iwa tawahi batu tyso.

— Deus utsal kytta Sudeutsabyitsa nisiwatawy. Asaktsa Deus bo mysioktyhyryknaha Sudeutsa Sesus harere bo batu hỹ zikaha. Iwa tubabatu Deus nizihikik. Ana humo hi batu myhyrinymyry. Hawa Sudeutsa Sesus harere bo hyỹ mykaranaha batu myhyrinymyry. Abaka ababo motsasoko ikiahatsa “O katsa zuba Deus nimywatawy ihyrytsa tsimoziknaha” — iwa batu tyso. Katukytsa mypehawy mytsaty mytsaty tsimahaktsa! <sup>26</sup> Sudeutsa sizubarẽtsa Deus bo mysioktyhyryk. Tubabatu Deus harere papeu humo ziwatahaka:

— Mymyoktyhyrykta Siã ezekta.

Sako tsekokatsa Sudeutsa simysapybyitsa tu nikaranahaze nisiokzohik ispiriktsokdata wata.



<sup>27</sup> Simysapybyitsa tu nikaranaha Deus nisiokzoba.

Hawa Deus botu nitsasoko atsatu mykara — niy.  
Iwa Deus harere papeu humo botu ziwatahaka.

<sup>28</sup> Aba Sudeutsa Kiristu harere bo batu hỹ maha iwaze Deus sukyrytsitsa niyziknaha. Wasaniha ty batu hỹspyk nikaranaha. Ana ty hi Sudeutsabyitsa mysitsumuẽhĩ. Ana humo hi Sesus Kiristu harere bo hyỹ tsimykaranaha iwatsatu Sudeutsabyitsa tsimaha. Tapara Deus Sudeutsa nisiwatawy ihyrytsa niyziknaha. Taparaktsa Sudeutsa Abarão, Isake, Sako iwatsa ispe niy:

— Ikiahatsa kahyrytsa tsimaha — niy. Iwatsahi Sudeutsa Deus harereziuwu, sihumo tsimypokzitsiukrẽta hỹ. <sup>29</sup> Iwatahi Deus ba meky watu ziksisapywy ba paikpa mytsaty ziky. Mytsaty mynakara tasopyk ty zuba mynakara. Tapetu isopykze:

— Asaktsa nisiwatawy, iwatahi mysisapywyky — my. Iwaze asaktsa nisiwatawy iwatahi mysisapywyky hỹ. <sup>30</sup> Iwatahi Deus ahahumo tsimypokzitsiarẽta. Taparaka ikiahatsa iharere bo batu hỹ tsikykaranaha abaka batu. Abaka iharere bo hyỹ tsimykaranaha Sudeutsa iharere bo batu hỹ niaha, ana humo hi Deus ahahumo tsimypokzitsiarẽta. <sup>31</sup> Aiba zuba Deus sihumo tsimypokzitsiarẽta aha watsa. Abaka Kiristu harere bo batu hỹ maha byri zuba niaha, iwatahi Deus sihumo tsimypokzitsiarẽta.

<sup>32</sup> Sudeutsa Sudeutsabyitsa kino niwatihi Deus okzeka sizubarẽtsa iharere bo batu hỹ zikaha. Iwahatuze Deus sizubarẽtsa humo tsimypokzitsiarẽta, Sudeutsa Sudeutsabyitsa humo kino niwatihi, nawatsa tu myzubahatsa humo tsimypokzitsiarẽta mopykyryk.

*Deus bo tsimysakibazikiknahaktsa.*

<sup>33</sup> O Deus bo tsimysakibazikiknahaktsa! Ipe tsimahaktsa!

— Ikia zuba amysapyrēnikita. Ikia zubata tsamyhyrizikwyrēta. Batu amy tohi ahumo ihokdaha. Tsinymyryba. Hawa mytsaty tsimykara katsaktsa batu myhyrinymyry. Hawa tsimyzuruku katsaktsa batu myhyrinymyry ikia zuba ahyrinymyrēta babata — tsimaha. <sup>34</sup>Deus harere papeu humo botu ziwatahaka:

— Batu aty tohi Deus bo zipeha my.

Hawa Deus mytsaty mynakara batu aty tohi zikmyhyrinymyry.

<sup>35</sup>Batu amy tohi Deus bo nyny zikaha.

Batu aty tohi isapyrēnikia ty ibo nynyspyk myze ba zikzihuak.

Tsizubarēna ituk — niy.

Iwa Deus harere papeu humo ziwatahaka.

<sup>36</sup>Deus koikny baktatu tsizubarēna nizukni. Usa bo mytsaty niy ana hi nizukni. Iwatsahi mybarawy tsizubarēna kytsa myzubatsa kino niwatihi ipe mykaranaha:

— Ikia zuba wasani tsimykara, ikia zuba tsamyhyrizikwyrēta — maha. Katsa niwatihi ibo tsimysakibazikiknaha!

— O ikia zuba amysapyrēnikita. Ikia apunihikrēnikita. Ba hawa tohi zikzukninaha. Myokzeka ikia tsamyharere-wabyrēta hỹ — tsimaha. Iwa hỹ.

## 12

*Deus tsyhyryze hyrizikosokdawy tsimykaranahaze mykurētsa tsimoziknaha.*

<sup>1</sup>Iwatsahi katukytsa Deus tawahi mytuk mynapykyryk mymysapywykik iwaze — ikia zuba mypehaktsa — ipe tsimahaktsa! Amy ty sa mozihikik ikiahatsa tihi:

— Katsaktsa anatyhi tsimykaranaha, aharere bo zuba hyĩ tsimyzihihiknaha hỹ — tsimaha. Iwa tsimyzurukunaha zeka ahakurẽtsa tsimoziknaha. Iwaze wasani tsimykaranaha.

<sup>2</sup> Mybarawy ezektsa sopyk tsimoewybaiknahaktsa! Hawa mytsaty tsimykaranaha Deus mekywaha tu mozihihik. Iwaze hawa Deus mozihihik tsipinymyrykynaha. Nawa wasani tsimykaranaha. Nawa tisapyrẽnikia ty tsipinymyrykynaha. Hawa Deus okzeka tsimyzurukunaha ana humo hi tsipinymyrykynaha, hawa Deus mozihihik ana humo hi ahahyrinymyrẽtsa tsimoziknaha.

<sup>3</sup> Deus zikwy botu katuk mynapykyryk ihyrizikt-sokzawy humo. Ana tarabajawy humo hi wasania ty motsasokoro. Ana humo hi ahape:

— Ahatuk batu tyso “utakta abazubata” — iwa batu tyso. Ahasoho bo mytsatyziutaha! Amy ty ihokdaha byizeka anaty kino tsimahaktsa! Tarabajaziu tahaktsa. Deus hi ahyriziktsokzawy humo zahapeha. Amy skaraba ahatarabajawy Deus pahapeha, ana bo hi tsimahaktsa kytsa!

<sup>4</sup> Katsaktsa mynury nanabyi meky watu, mytsyhyrypetsa, mypyrytsa, myhyriziktsa, myhyrytsa iwatsa tsizubarẽna tsimaha. <sup>5</sup> Iwata katsaktsa Sesus harere bo hyĩ tsimykaranaha inury wata tsimoziknaha. Katsaktsa myzubarẽtsa tsimaha, hawa ha tsimyzihihiknaha estuba zubata watsa atsatu mytsaty tsimykaranaha. Amy ty Kiristu mozihihik ana humo hi tsimynakaranaha. Estuba estuba zuba tahahyrizitsokzawy humo mynakaranaha katsaktsa tsinaharapetsumuẽhikĩnaha hỹ.

<sup>6</sup> Deus myhumo tsimypokzitsiarẽta isapyrẽnikia ty mybo nyny mynakara. Ihyriziktsokzawy humo izikwy mytuk mynapykyryk. Iwatsahi estuba estuba zuba izikwy mymypehaka ana humo kino tsimahaktsa! Wastuhutsa

izikwy ty mynapykyrykze Deus wasania ty motsasozuikunaha. Asaktsa wasania ty tytsasokonaha za. <sup>7</sup> Utsa izikwy situk mynapykyryk iwatsahi Sesus tuktsa bo mysitsumuēhīkī iwaze asaktsa Sesus harere bo hȳy mykaranaha, asa bo hi tysitsumuēhīkīnaha. Utsa izikwy situk mynapykyryk iwatsahi Sesus tuktsa mysihyrinymyrynaha. Iwaze asaktsa Sesus humo sispirikporētsa. Asa bo hi tsihyrinymyrynaha. <sup>8</sup> Utsa izikwy situk mynapykyryk iwatsahi sipehawy kytsa bo mynasiakuwyky. Asaktsa sipehawy tytsasokonaha. Utsa izikwy situk mynapykyryk iwatsahi sinamyrētsa moziknaha batu taha bo zuba mykaranaha, asaktsa Deus zikwy humo sinamybyitsa bo nyny mykaranaha. Utsa izikwy situk mynapykyryk iwatsahi kytsa humo mysipokzitsikinaha, iwaze asaktsa utsa kytsa humo tysipokzitsikinaha. Utsa simypokzitsiukbyitsa bo mysitsumuēhīkīnaha iwatsahi asaktsa sakurētsa Deus zikwy humo wasani mykaranaha.

<sup>9</sup> Tyharape pokzitsikinahaktsa! Iwa tsimykaranaha zeka ba zikmyspihikbata. Isapyrēnikia ty ahakparawy! Ahasopyksapybyri tsimoewybaiknahaktsa! <sup>10</sup> Ikiyahatsa Sesus humo ahaturytsa tsimaha. Iwatsahi tyharape pokzitsikinahaktsa! Ahawahoro ezektsa watsa humo ahamy-pokzitsirētsa. Tyharape pokzitsinahaktsa. Iksazubataha tsimahaktsa! <sup>11</sup> Deus harere bo yh̄y tahaktsa! Ihyriziktsokzawy humo tsimykaranaha. Ahazikara byihu ja. Ahakurētsa tu Deus harere bo yh̄ytahaktsa!

<sup>12</sup> Kiristu taperyky iwatsahi ahakurētsaktsa! Utsa kytsa pahaknikinahaze ahapunihikrētsaktsa! Deus bo typamykysoikiknahaktsa! <sup>13</sup> Utsa kytsa Sesus harere bo hȳy mykaranaha batu sinamyky ahanamy ty sibo tsiabiaknaha nyny nyny tahaktsa! Ahabo mozumunaha zeka ikiahatsa tihi:

— Pany pakutynaha. Mytuk tyzadisahanaha. Kawahoro eze tu ahawanu tsihahañaha — tsimaha.

*Kytsa sizubar*ẽtsa mysipokzitsikinaha. Mysukyrytsitsa humo kino niwatihi tsysipokzitsikinaha.

<sup>14</sup> Asaktsa pahasukyrikiknahaze sitsyhyryze batu Deus bo:

— O Deus myzo tsysitsapusarekta — iwa batu zikaha. Ikiahatsa tihi:

— O myzo asahi nimysukyrykynahatsa tu tsysipywyky — tsimaha. <sup>15</sup> Kytsa sakurẽtsa tuk zeka ikiahatsa kino ahakurẽtsa tsimoziknaha! Siakubyitsa tuk mykaranaha zeka ikiahatsa kino batu ahaku. <sup>16</sup> Kytsa sizubarẽtsa tsysipokzitsikinahaktsa! Tyhapepokzitsikinahaktsa! Sinamybyitsa kino ahaharereziuwytza moziknaha. Batu tyso:

— Katsaktsa myhyrinymyrẽtsa — iwa batu abazubatsa tsimaha.

<sup>17</sup> Asahi simysapybyitsa tu ahabo nikaranaha zeka batu isty tsapusare. Hawa kytsa okzeka wasani tsimykaranaha. Iwaze kytsa ahasoho ty batu tyso:

— O asaktsa batu simysapy maha — iwa batu zikaha. <sup>18</sup> Aha humo batu ihokdaha byizeka kytsa tuk yhỹ tsimaha, batu ahamyiki. Tsahamykpyriziurẽtsa. <sup>19</sup> Batu aty tohi ba ziktatsapusare. Kytsa imysapybara ty mykaranaha Deus zuba tsihyrinymyrẽta, atahi sinini ykarawy bo mysipeha. Deus harere papeu humo ziwatahaka:

— Utakta kytsa bo asaktsa kytsa nisisapybyrikinaha, mysitsapusare, simysapybyitsa nikaranaha humo mysisininiwy sihuak waha humo mysisininiwyky — niy.

<sup>20</sup> Usta Deus harere papeu humo ziwatahaka:

— Asukyrytsitsa saraparētsa zeka, adisahawy ty sibo nyny tsimy.

Sarapurukrētsa zeka pihik ty sibo nyny tsimy.

Iwa tsimy zeka sisikpybyrētsa moziknaha — niy.

Iwa Deus harere papeu humo ziwatahaka.

<sup>21</sup> Iwaze simysapybyikitsa ahape maha zeka:

— Katsa mywatu tahaktsa! — maha. Ikiahatsa ispe tsimaha:

— Batu hỹ — tsimaha. Ahatsapusarebyitsa tu kytsa tysisapywykynahaktsa. Iwa tsimyzurukunahaktsa kytsa!

## 13

*Mybarawy ezektsa ahapehatsa harere bo yhỹ* tahaktsa.

<sup>1</sup> Kyze mybarawy ezektsa ahapehatsitsa sitsumuēhĩtsa kino niwatihi siharere bo yhỹ tahaktsa! Ahapehatsitsa pahapehanaha Deus harere humo zuba — ikiahatsa tysipehanaha — my iwatsahi pahapehakanaha. Iwa Deus mykara. <sup>2</sup> Iwaze aty zeka ipehatsa tsumuēhĩtsa harere bo yhỹ ahabyizeka atakta Deus harere bo kino niwatihi yhỹ ahabyizeka iwatahi sinini mykara.

<sup>3</sup> Asaktsa wasani mykaranaha tahapehatsa humo batu sipyby. Asahi batu sopyksapy mykaranaha zeka tahapehatsa pokso sipybyrētsa. Ahapybybyi zeka mypehatsa tysisapywykynahaktsa kytsa! Iwa tsimykaranaha zeka asahi:

— O ikiahatsa wasani tsimaha — maha.

<sup>4</sup> Ahapehatsa tsumuēhĩtsitsa ahamo simypokzit-siukrētsa moziknaha. Siharere bo yhỹ ahabyizeka ahamysapybyitsa ty zuba tsimykaranaha. Deus pahamy-itsapyriwyky siharere humo, asaktsa sitsumuēhĩtsa bapatsa maha iwatsahi mysapybyitsa tu tsimykaranaha zeka ahapehatsa pokso ahapybyrētsa tsimoziknaha ana kino wasani my. <sup>5</sup> Iwatsahi apehatsa tsumuēhĩtsa siharere

bo hyĩ tahaktsa! Siharere bo yhyĩ ahabyizeka sipokso tsahapybyrētsa, sinini tsimaha humo tsahapybyrētsa. Siharere bo hyĩ ahabyizeka iwaze sinini tsimykaranaha Deus okzeka wasani my, iwatsahi ikiahatsa siharere bo hyĩ tsimaha.

<sup>6</sup> Ana humo hi ahaokyrysaro ty tsapukte bo apehatsa bykytsa bo nyny taha. Tarabaja mykaranaha zeka Deus harere humo sihyriziktsokzawy mykaranaha. <sup>7</sup> Amy ty sa ihuak ty sibo nyny tsimaha zeka anaty kino sibo nynyzo tsimaha. Apehatsa tsumuēhĩtsitsa harere bo tsiwabytok-tonahaktsa! Siharere bo yhyĩ tahaktsa!

*Tyharape pokzitsikinahaktsa.*

<sup>8</sup> Batu aty tohi bo ihuak ty ibo nynyzo zikaha. Ahahuak humo tsipykbanaha! Tyhapepokzitsikinaha zubaktsa! Ana kino tsimaha zeka myhuak watsa kytsa bo botu nyny tsikaha. Utsa kytsa bo tsipisapywykiknaha zeka iwaze Moises sopykwy bo tsizubarēna tsimykaranaha. <sup>9</sup> Deus harere isopyk tihi:

— Mektza okeza ba ziksipyryryknaha. Ba zibezenaha. Usta namy ty hyryk hyryk byitaha. Harape namy bo ka iktsa zubataha — niy. Iwaze ipehawy tihi:

— Aotutsa pauktsitsa humo tynasipokzitsikinahaktsa ahumo tsinakara nahawa tihi tysipokzitsiki — niy. Ana humo kino yhyĩ tsimaha zeka taparaktsa harere niwatihi yhyĩ tsimykaranaha. <sup>10</sup> Aty zeka ipytowybara ty pauktsitsa mysisapywyky zeka ba zimyi. Iwatsahi ahamyibyitsa tu zeka Deus harere bo hyĩ tsimykaranaha hỹ.

*Wasani tsimyzurukunahaktsa kytsa!*

<sup>11</sup> Iwaze kapehawy ty hawa tsimyzurukunaha wa tynakaranahaktsa kytsa! Sesus myziksizo. Ikiahatsa Sesus harere bo hyĩ tsimykaranaha zeka hanawa puruze taperyky. Iwatsahi ahaōtutsabyihu ja. Sesus taperyky!

<sup>12</sup> Hanawa puruze Sesus Kiristu myziksizoze nakyoksohoze kywa. Iwatsahi mysapybara tsikykaranaha myta-moewybaik! Asaktsa mysapybyitsa tu mykaranaha miwa zuba siakparawy. Kytsa sibo batu iktsa zikaha. Sipapatu nikaranaha. Ikiahatsa batu siwatsa tsimahaktsa! Deus mozihikik ana ty hi tsimykaranahaktsa kytsa!

Sodadutsa sibotoarëtsa iwatsahi tahasukyritsitsa weryk tu tahazozikbanaha. Siwatsa katsaktsa Kiristu zikwy mytuk mynapykyryk zeka wasani tsimoziknaha. Ba zikmyizonaha. <sup>13</sup> Iwa wasani tsimyzurukunaha zeka batu mysikpyby. Kytsa watsa asahi okoroze mynakurunaha iwaze kytsa sizubarëtsa sibo iktsa maha. Siopuwy tsõsĩ ty ka tsõ tsõ byitaha. Tspikukunaha zeka tsimyharape sapybyikinaha siopuwy tsõsĩ humo. Utsa okeza humo ba ziksityrykzuwynaha! Sibo hua hua byitahaktsa! Usta maku bo harape tyka wowo byitaha iwa zeka pahamyiba! Ahazokdibiyihu ja! Harape tyhudiduhudidu byijataha! <sup>14</sup> Katsa hawa sa tsimyzihikiknaha ana ty hi tsimykaranaha zeka mysapybyitsa tu tsimykaranaha. Hawa tsimyzihikiknaha ana humo kino awatutaha! Sesus Kiristu zikwy mytuk mynapykyryk iwaze imysopyksapybara humo batu hỹ tsimaha. Sodadutsa sibotoarëtsa maha iwatsahi tahasukyritsitsa weryk tu tahazozikbanaha. Siwatsa Sesus Kiristu zikwy mytuk mynapykyryk iwaze mysapybyitsa tu tsimykaranaha batu hỹ tsimaha ihumo tahamoewy. Iwatsahi katsa hi:

— O Kiristu azikwy mytuk mynapykyryk! — tsimaha. Iwa hỹ.

## 14

*Atukytsa ba zikarapepeha.*

<sup>1</sup> Iwaze kytsa Sesus harere bo hyỹ mykaranaha sihumo ahakubyrisoroku ja tsimaha. Asahi:



— Hawa skaraba Deus okzeka wasani my. Katsaktsa tsikaeni zuba myhyrinymyry — maha. Sihumo ahakubyrisoroku ja! Ba zikarapepehanaha iwatsatu meky watu mytsaty mykaranaha. Mysitsumuēhīnaha!  
<sup>2</sup> Wastuhu kytsa Sesus tuktsa:

— Katsaktsa siraratsani humo mysiborokonaha zeka Deus okze ka wasani — mykaranaha. Utsa Sesus tuktsa:

— Katsaktsa myzohotsa tahaborokonaha zeka Deus okzeka batu wasani. Iwatsahi wihara ty zuba tsinamydisahakanaha — mykaranaha. <sup>3</sup> Asaktsa siraratsani humo mysiborokonaha batu tyso:

— Asahi wihara ty zuba natahadisahakanaha batu sihyrinymyry — mykaranaha. Iwa tsimytsasokonaha zeka tsisisapybyrikinaha. Siwatsa asaktsa wihara ty zuba tahadisahakanaha batu tyso:

— O asahi siraratsani humo piboronahaze simysapybyitsa tu mynakaranaha — mykaranaha. Iwa tsimytsasokoronaha zeka tsisisapybyrikinaha. <sup>4</sup> Aty ipehatsa tsipisapybyiki zeka batu wasani my, ipehatsa zuba isoho pisapybyiki. Katsa Sesus tuktsa Deus mypehakatsa. Atakta Sesus tuktsa mypehakatsa Deus harere humo zuba hyŷ mynakara. Hawa mykara Deus ipe:

— O nawa tsimykara wasani — my. Ata hi zuba awatu mynakara. Imysapybyita tu mykaraze Deus ipe:

— O nawa tsimykara batu amysapy — my. Mypehakatsa zikwy ituk mynapykyryk nawa wasani mozuruku hŷ.

<sup>5</sup> Aty:

— Nawa puruze tabyryky Deus okzeka tisapyrēna iwatahi ba amy tohi humo zikaha — my. Usta batu:

— Pibiyituhukutu atsatu maha iwatahi kahyrikosokzawy humo mykara — mykaranaha. Estuba estuba zuba tahapetu sisopyk:

— Hawa ha ty mozuruku zeka wasani — mykaranaha. Deus okzeka kytsa meky watu mytsaty mykaranaha zeka wasani my. <sup>6</sup> Aty zeka:

— Nawa puruze tabyryky iwatahi ba amy tohi humo zikaha iwa Deus pokzi mynakara. Aty tazoho piboro zeka:

“O Deus myzo kakurēta, ikiakta kazoho ty kabo nyny tsiky” — my iwa Deus bo mynapamykyso. Aty wihara ty tadisaha zeka:

— O Deus myzo kakurēta, ikiakta kadisahawy ty kabo nyny tsiky my — iwa Deus bo mynapamykyso. <sup>7</sup> Batu aty tohi tabo zuba mynakara. Myokzetuze hawa tsimyzurukunaha zeka Deus mynamysukparaka. Tsimyhyrikosokdanahaze Deus mynamysukparaka iwatsahi mywahi Deus tyryktsa tsimoziknaha. <sup>8</sup> Iwatsahi myokze tuze Deus mypehakatsa harere bo yh̄y tsimykaranaha. Tsimyhyrikosokdanaha zeka Deus tuk tsimynapykyryknaha. Iwatsahi katsaktsa mywahi Deus tyryktsa tsimaha. <sup>9</sup> Kiristu mypehakatsa anahumo hi nihyrikosokda. Iwaze zuba Deus zihyryzikpowy ispitu niyzikzo. Abaka mypehakatsa niyzik, Kiristu tuktsa botu nihyryzikosokdanaha atahi sipehatsa niyzik. Katsa kino niwatihy iharere bo hȳy tsimykaranaha atahi mypehakatsa. Myzubarētsa mypehatsa niyzik.

<sup>10</sup> Ikiahatsa ja. Wastuhu kytsa ahatuk ahatukytsa tsimysisapybyikinaha. Batu imysapy tsimaha. Usts ahatuk ahatukytsa tsimysisapybyikinahaze ispe maha:

— Ikiahatsa batu wasani tsimaha — tsimykaranaha. Ikiahatsa mytsatziutahaktsa amy wa taba parakbaha Deus okze tsinamykahabanahazo iwaze myhuak ty mybo nyny my, hawa haty tsikzurukunaha mybo ihuak ty nyny my. <sup>11</sup> Deus harere papeu humo botu iwatahaha:

— Mybarawy ezektsa na watsa tu kaokeryk tahaekaratsa humo puruk puruk maha,

(kahumo iktsazuba mykaranaha humo puruk puruk maha).

Mywatu: “Ikia zuba Deus babata” maha.

Sizubarëtsa mybarawy eze ktsa iwa mykaranaha — niy.

<sup>12</sup> Mywatu Deus bo tsimaha. Hawa mybarawy eze zikzurukunaha ana hi Deus bo tsimytsasonaha, iwaze myhuak ty mybo nyny my.

*Atukytsa soho ba zisapybyrinaha.*

<sup>13</sup> Iwatsahi mytukytsa ba zik soho metunaha! Mytukytsa okzeka wasani tsimyzurukunahaktsa kytsa! Mypetu mysopyk:

— “Hawa hasa mytukytsa pimysapybyikinaha iwaze asahi batu hÿ zikaha” tysitsumuëhÿ — tsimaha. <sup>14</sup> Hawa Sesus mytsaty mykara uta kino niwatihi mytsaty mykara. Disahawy tsizubarëna kabo ty wasani ana humo kahyrinymyrëta. Utsaktsa hi:

— O ana disahawy kahumo batu wasani — mykaranaha. Iwaze asaktsa ana disahawy ty tahadisahakaranaha zeka sihumo ka batu sapy. Iwatsahi pimysapybyikinaha.

<sup>15</sup> Ikiahatsa ahazoho tsipiborokonaha zeka ahatukytsa bo batu sapy my, iwa zeka ahahumo batu siaku. Ahazoho tsipiborokonahaze ahatukytsa ana bo hi iktsa maha zeka ahahumo tahasapybyikinaha. Iwa tsimyzurukunaha zeka ahatukytsa ba ziksipokzitsi. Ahazoho humo zuba ahatukytsa tsiksisapybyikinaha. Kiristu sisapyzesty ni-hyrikosokda ikiahatsa humo hi Deus tuk ba zik kapykyryk naha.

<sup>16</sup> Iwatsahi ahaokze ka tisapyrëna ana kino ustsya kytsa pisapybyikinaha. Sibö batu imysapy my zeka batu tyso — O mahani, ana ty hi wasani — iwa batu tyso. Nawa tisapyrëna pisapybyikinaha.

<sup>17</sup> Katsaktsa Deus tyryktsa tsimaha. Amy ty sa hauk tsimykaranaha, amy ty sa tsipikukunaha nawa humo hi Deus tyryktsa batu zikyzyknaha. Batu ba. Deus hyrikoso humo ityryktsa tsimoziknaha. Ata humo hi Deus harere bo hỹ tsimykaranaha. Ata humo hi mytukytsa ba zikmybetsaknaha tysiyyikwykynahaktsa. Ihumo mykurētsa h̃y. <sup>18</sup> Iwa tsimyzurukunaha zeka Deus myhumo tsakurēta mozik. Ustsa kytsa kino:

— Deus situk mynapykyryk iwatsahi ityryktsa moziknaha wasani mykaranaha — maha.

<sup>19</sup> Iwatsahi tyharape pokzitsikinahaktsa kytsa! Kytsa tysipunihikwykynahaktsa tsimaha. Iwaze ustsa kytsa ahahumo Sesus harere bo hỹ mykaranaha.

<sup>20-21</sup> Ikiyahatsa siraratsani natahaborokonaha. Ahabo tisapyrēna. Ustsa Sesus tuktsa sizoho meky watu zeka batu hauk zikaha, sihumo ka batu isapy maha, iwaze ikiahatsa kino niwatihi situkze ahazoho ty batu hauk tsimaha. Ahazoho ty siokze hauk tsimaha zeka ahatukytsa ahahumo Sesus harere bo batu h̃y mykaranaha. Iwatsahi ahazoho ty hauk hauk ahabyitaha! Duabohotsa tsik siokze tsō tsō byitaha! Iwa tsimaha ty zeka ahatukytsa tsimysisapybyrikinaha batu zikaha! Iwa ahatukytsa tysipokzitsiki. Sihumo imysapybara ty ka hauk hauk ahabyitaha! Iwaze ahatukytsa ba zisimiywy.

<sup>22</sup> Ahaokze ka sizoho ty sasabyitsa kino niwatihi wasani my. Deus bo zuba ana soho ty tsimytsasononaha. Ustsa kytsa bo ba ziktsasonaha. Asaktsa batu paikpa mytsaty zikaha iwatsahi sakurētsa mopykyryknaha. Asahi amy ty tisapyrēna mykarannahaze batu tyso:

— Ana kino tisapyrēna yh̃ja — iwa batu tyso. Iwaze asaktsa sakurētsa h̃y. Hawa batu isapy mytsaty mykaranaha zeka awatutaha. <sup>23</sup> Aty zeka izoho ty sasabyitsani kino niwatihi piboro zeka:

— Ana ha azoho ty Deus okzeka tisapyrëna ja. Yhÿja — my. Deus isoho:

— Hawa tsimykara batu isapy — my. Sihyrinymyryby-itsa tu hauk maha zeka iwaze sibo batu isapy my. Hawa tsimykaranaha ana soho ty:

— Hawa tsimykaranaha wasani my ana humo hi myhyrinymyrëtsa — tsimaha. Iwaze wasani my. Katsaktsa hi hawa tsimykaranaha ana soho ty:

— Hawa tsimykaranaha wasani ja. Yhÿ ja — tsimaha. Iwaze Deus okzeka imysopykbara ty tsimykaranaha.

## 15

### *Utsa bo tysiakuwyky.*

<sup>1</sup> Katsaktsa Sesus harere bo hyÿ tsimykaranaha hÿ mytukytsa Sesus tuktsa bo tysiakuwykynaha. Ahakubyrisorokuja! Mytukytsa asa hi:

— Amy skaraba Deus okzeka wasani my. Katsaktsa batu myhyrinymyry — mykaranaha. Asaktsa tsikaeni zuba Sesus harere bo hyÿ mykaranaha. Iwaze katsaktsa mybo zuba batu mytsaty zikaha, sibo hi mytsatytahaktsa! <sup>2</sup> Mytuktsa pauktsitsa Sesus tuktsa tysiakuwykynaha! Ty-sisapywykynaha iwaze Sesus harere bo hyÿ maha.

<sup>3</sup> Kiristu soho bo mytsaty tsimahaktsa! Ihumo zuba batu mytsaty ziknakara utsa kytsa bo zuba mytsaty ziknakara hÿ. Iwatsahi ikiahatsa iwata niwatihiktsa kytsa! Deus harere papeu humo ziwatahaka:

— Asaktsa ziksapybyikinaha anahi Deus bete zizozoko naha — niy. Iwa ziwatahaka Sesus soho niy.

<sup>4</sup> Deus harere papeu humo mytsyhyryze ziwataha. Ana ty hi mymyhyrinymyryky, ana humo tsipinymyryna-haze mykubyrisorokrētsa tsimoziknaha. Tsipinymyryna-haze ihumo mypunihkrētsa tsimoziknaha. Iwatsahi is-apyrēnikia ty taperyky, Deus papeu humo mymykuwyky.

<sup>5</sup> Deus bo ahatsyhyryze mopamykysoikik ipe mykara:

— O myzo ikia zuba tsimymypunihikwyky, ikia zuba tsimymozikwyky, ana kino Homa ezektsa bo nyny tsimy. Hawa mozikniknaha zeka estuba zuba wata moziknaha, ikia humo mysitsumuēhikī iwa tsimy. Nizihikiknahatsa hi Sesus Kiristu wata maha. Hawa Sesus Kiristu zikzuru-ruku asa kino niwatihi iwata mozurukunaha — iwa Deus bo ahatsyhyryze mopamykysoko. <sup>6</sup> Iwaze ikiahatsa ahazubarētsa Deus bo tsimysakibazikiknaha:

— O Deus myzo ikia zuba mypehakatsa. Ikia zuba amysapyrēnikita — tsimykaranaha. Iwaze Deus Sesus Kiristuzo bo tsimysakibazikiknaha.

*Deus wasaniha Sudeutsabyitsa bo motsaso.*

<sup>7</sup> Iwatsahi tyharapehapokzitsikinahaktsa kytsa! Hawa Kiristu ahahumo tsimypokzitsiarēta ikiahatsa atsatu harape bo tsimykarannahaktsa! Kyze kytsa tihi:

— O Deus tsimysapyrēta ihyrytsa bo iktsa tsimaha. Hawa ihumo zuba myharape pokzitsikinaha, iwatahi Deus tsimysapyrēta hỹ — mykaranaha. <sup>8</sup> Kiristu mybarawy bo inasik. Sudeutsa Deus bo mysioktyhyrykta anahumo hi inasik. Izumuze nisihyrinymyryky hawa ha ty Deus botu nitsasoko nisihyrinymyryky atsatu mykara. Taparaktsa mydiritsa hawa ha ty Deus sibo botu nitsasoko atsatu Sesus nikara, izumuze Sudeutsa Deus bo mysioktyhyryk. <sup>9</sup> Mybarawy bo inasikze Sudeutsa mysioktyhyrykta Deus bo my, Sudeutsabyitsa kino niwatihi Deus bo mysioktyhyryk. Asa hi:

— O Deus ikia tsamysapyrēta myhumo kino niwathi tsamypokzitsiarēta, Sudeutsabyitsa tsimaha — mykaranaha. Tapara Deus harere papeu humo ziwatahaka:

— Iwatahi utakta Sudeutsabyitsa situkze Deus pe “Ikia zuba wasani tsimy. Ikia zuba amysapyrēnikita my”

Sudeutsabyitsa ana hi piwabykynaha, abo iksakibazikikze ana hi piwabykynaha — niy.

<sup>10</sup> Usa papeu humo:

— O Sudeutsabyitsa ikiahatsa Deus watawyhytsa Sudeutsa tuk ahakurētsaktsa! — niy.

<sup>11</sup> Usa papeu humo:

— O Sudeutsabyitsa sizubarētsa Deus bo tsimysakibazikiknahaktsa!

Mybarawy Ezektsa nanabyitaba sizubarētsa kino niwatihiktsa! “O ikia zuba wasania ty zuba tsimykara.” tsimahaktsa — niy.

<sup>12</sup> Deus sohokotsa Isaijas usa papeu humo ziwatahaka:

— Taparakta mydiri Sese estuba tsekoka Sudeutsabyitsa pehakatsa mozik.

Deus bo mysioktyhyryk, isapyrēnikia humo piperykynaha hỹ — niy.

Sese tsekoka Kiristu my.

<sup>13</sup> Iwatahi Deus ahatsyhyryze ipe my:

— O Deus myzo ikia hi isapyrēnikia ty taperyky atuk mywahi mynapykyryknaha ana kino taperyky. Ikia tysiakuwyky hỹ batu paikpa mytsaty zikaha. Aharere bo hỹ mykaranaha iwatsahi ahumo sispirikporētsa moziknaha ahyrikoso humo mospirikpotohinaha, azikwy humo sispirikporētsa hỹ — my. Iwa Deus bo mopamykyso.

*Pauro Homa Ezektsa bo mypubara ty motsasoko.*

<sup>14</sup> O katukytsa utakta ahasoho humo inymyryba ahamysapyrëtsa hÿ. Ahahyrizikporëtsa ana humo hi kahyrinymyrëta. Tyhapehyrinymyrykynaha.

<sup>15</sup> Iwatatuze papeu humo ahabo piwatahaka wasania ty piwatahakazo batu kasikpyby ana humo ahaspiriktsokdabyihu ja. Deus harere motsasoziuku iwaze anasoho bo hi mytsaty tsimykarana. Iwa my Sesus Kiristu humo atahi kahyritsokzawy humo zikpeha.

<sup>16</sup> Utakta Sesus Kiristu tsumuëhÿtsa, ana bo hi zikwatawy. Uta Sudeutsabyitsa bo zikwatawy. Deus harere wasania ty sibo motsasoko ana humo hi zikwatawy. Utakta Deus wahoro zubata eze ziknapamykysokota wata asa humo ka Deus tsakurëta. Hawa Deus nizihikik ziknakarana ana humo hi Deus tsakurëta. Iwatatu Deus wasania ty Sudeutsabyitsa bo motsasoko, kyze Sudeutsabyitsa Sesus harere bo hyÿ mykaranahaze Deus ana humo hi tsakurëta hÿ. Asaktsa meky watu moziknaha, Deus hyrikoso humo simysapyrëtsa moziknaha, Deus tyryktsa moziknaha.

<sup>17</sup> Deus tsyhyryze tarabajaziu mynakara, hawa Kiristu mozihikik naha humo zuba mynakara iwatahi kahyritsokzawy humo kakurëta. <sup>18</sup> Kiristu kahumo Sudeutsabyitsa Deus harere bo hyÿ mykaranaha izikwy kahumo hi katuk mynapykyryk. Iwatsahi Sudeutsabyitsa Deus harere bo hyÿ mykaranaha. Batu kasikpyby. Hawa iktsasoko naha humo batu kasikpyby. Hawa ikykara ana humo hi batu kasikpyby iwatahi Sudeutsabyitsa Deus harere bo hyÿ mynakarana. Hawa skaraba Kiristu mozihikik ana humo hi yhÿ mynakara iwaze Sudeutsabyitsa Sesus harere bo hyÿ mynakarana hÿ.

<sup>19</sup> Deus zikwy katuk mynapykyryk, ihyrikoso humo amy ty kytsa batu zikaha utakta ikykara. Deus hyrikoso katuk mynapykyryk iwatahi kytsa iksizororowy. Iwat-



sahi kytsa kabo iktsaziu nikaranaha iksi humo kyokbaik. Iwatawytsa humo Deus wasania ty bo yhỹ mykaranaha. Nanabyitaba Deus wasania ty Sesus soho iktsasoko, taparaka Serusarēhe eze iktsasoko, iwaze ikparakzo nokponi ikukuru. Iriria bo ikzumu. <sup>20</sup> Utakta Deus wasania ty motsaso tsihikik asa hi Sesus soho batu siwabyhy. Asaktsa isoho batu siwabyhy ihumo sispirikpobyitsa sibo hi Deus wasania ty iktsasoko. <sup>21</sup> Hawa Deus harere papeu humo botu ziwatahaka anawa ha ikykara papeu humo:

— Asaktsa Deus zipehata soho batu siwabyhy isoho piwabykynaha.

Deus wasania ty isoho piwabyziukunaha — niy.

*Pauro Homa bo mynakozore tsihikik.*

<sup>22</sup> Kyze utakta ahabo mynakozore tsihikik batu zik. Deus wasania ty siwabyhybyitsa bo motsasoko iwatahi ahabo batu pão. <sup>23</sup> Abaka hyriziktsokzawy nabytykara eziky nepykbaik. Iwa niytyk tseheze tsizubarēna ahabo mynakozore tsihikik.

<sup>24</sup> Ahabo moparakze ahatuk pyryspykare my mokozore. Espanija bo moparakze ahaburuk my. Iwaze Espanija bo moparakze ikiahatsa hi tsipiktsumuēhīnaha. <sup>25-26</sup> Abaka Serusarēhe bo mokuru. Masedonia Ezektsa, Akaija Ezektsa ahatsa niwatihi siokyrysaro waka ziperykynaha. Ana okyrysaro ty Serusarēhe Ezektsa Sesus tuktsa sinamybyitsa bo pinyny tsihikiknaha. Iwatahi ana okyrysaro waka sitsyhyryze wabehyryk my sinamybyitsa bo nyny my. <sup>27</sup> Asaktsa Masedonia Ezektsa, Akaija Ezektsa ahatsa niwatihi Sudeutsabyitsa maha. Sesus harere bo hyỹ mykaranaha iwatsahi ihumo sispirikporētsa. Sudeutsa hi Deus wasania ty sibo nitsasokonaha anahumo hi batu sispiriktsokda. Iwatsahi siokyrysaro ty ziperykynaha ana ty hi Sudeutsa sinamybyitsa bo nyny maha

iwa mozihihikiknaha. Sudeutsabyitsa Sudeutsa mysit-sumuēhīnahaze wasani my iwa sinamybyitsa bo mysit-sumuēhīnaha. Sesus humo situkytsa moziknaha.

<sup>28</sup> Anahyrikosokzawy nepykze, ana okyrysaro ty tsizubarēna sinamybyitsa bo nyny my, iwaze Espanija bo moparakze ahaburuk mynakozore. <sup>29</sup> Ahabo pomoze hawa Kiristu pahasapywy tsihikik ahatuk motsasoko. Kabo piksapywyky ahabo niwatihi pahasapywyky. Kaharere isoho humo ahakurētsa tsimoziknaha.

<sup>30</sup> O katukytsa katsaktsa Sesus harere bo hyŷ tsimykaranaha iwatsahi ihumo myspirikporētsa, Deus hyrikoso humo tsimyharape pokzitsikinaha iwatsahi katsyhyryze Deus bo typamykysonahaktsa kytsa! Iwa mozihihikik hŷ. Ipe tsimaha:

— O myzo ikia Pauro tsitsumuēhīkta! Ahumo tsipuni-hikrēta mozik. Mokuruze typokzitsikta. <sup>31</sup> Asaktsa Sudeutsa aharere bo batu hŷ maha, Pauro ty ka beze beze byitaha, ity ykni ykni byijataha. Ikia Pauro tsipokzitsikta! Serusarēhe ezektsa Sesus tuktsa tysitsumuēhīktsa! Sudeutsabyitsa siokyrarsaro piaksekenaha, ana humo kino amytsatyhy byihuja ahumo sakurētsa moziknaha — tsimaha iwa Deus bo katsyhyryze tsimypamykysokonaha.

<sup>32</sup> Ana humo kino tsimykaranaha zeka kakurēta mozik. Iwaze Deus mozihihikik zeka ahabo mynakozore. Kakurēta hŷ. Ikiatsa tsipikykykynaha niwatihi ana humo hi kahyrinymyrēta. <sup>33</sup> Deus bo ahatsyhyryze mopamykysoko:

— O Deus myzo Homa ezektsa tysipokzitsikta! Batu paikpa mytsaty mykaranaha ahumo sakurētsa moziknaha — my. Iwa hŷ.

## 16

*Sizubarētsa* humo kahyrihikbarēta.

<sup>1</sup> Kyze Pebe inarokotatsa myzawy pe:

— Ikia tsamysapyrētatsa — my. Atatsa Sesus tuktsa izumubanahaze Deus harere piwabykynaha mysitsumuēhīkī. Asaktsa Kēkereja ezektsa mysitsumuēhīkī. <sup>2</sup> Ahabo mozu-muze ikiahatsa hi:

— O myzawy pany pakutyny. Mytuk tsikadisaha mywahoro eze tsikuru — tsimaha. Iwa Sesus tuktsa sizubarētsa tynahapepokzitsikinahaktsa. Atatsa kino sizubarētsa nisitsumuēhīkī atatsa ziktsumuēhīkī. Iwatsahi hawa itsyhyryze tsimaha ana ty kino tsimahaktsa!

<sup>3</sup> Kytsa sizubarētsa Homa ezektsa sihumo kahyrizikbarēta Pirisira, Akuiro ibarikta kino niwatihi sihumo kahyrizikbarēta. Asahi katuk Sesus Kiristu tsyhyryze tarabajaziu ziknakaranaha. <sup>4</sup> Kapokzitsiwytu asiba tahabawynaha. Sisohe motsasoko:

— Tsahamysapyrētsa — mynakara. Iwa ustsā kytsa Sudeutsabyitsa mykaranaha. Sesus tuktsa nanabyitaba atsatu motsasokonaha. Asaktsa izumubanahaze Deus harere piwaby tsihikiknaha. <sup>5</sup> Sesus tuktsa niwatihi siwahoro bo izumubanahaze sihumo kahyrizikbarēta.

Epeneto inarokota kaharereziuwu humo kahyrizikbarēta. Atakta taparakta Sesus harere bo hȳ nikara Asia ezekta my.

<sup>6</sup> Maria humo kahyrizikbarēta niwatihi. Atatsa ahatuk Deus pokzi tarabaja ziknakara.

<sup>7</sup> Katukytsa Āderoniko, Sunias ahatsa niwatihi sihumo kahyrizikbarēta. Katuk sakyriukrēnikitsa hurukwy eze niapykyryknaha. Asaktsa Deus nisipeha Deus harere nitsasokoronaha ana humo kino siakzohotsa sihyrinymyrētsa. Utakta batu Sesus tukta tuze ihumo batu kaspirikpobyize asaktsa botu Sesus tuktsa niaha.

<sup>8</sup> Āpiriato humo kahyrizikbarēta. Atakta kaharereziuwu hȳ ata kino Sesus harere bo hȳ ziknakara niwatihi.

<sup>9</sup> Urubano humo kahyrizikbarēta atahi katuk Sesus soho nitsasoko. Estakis kino niwatihi kaharereziuwu humo kahyrizikbarēta.

<sup>10</sup> Aperes humo kahyrizikbarēta atakta tsakubyrisorokrēta tu Kiristu tuk mynapykyryk. Aristoburo wahoro ezektsa kino niwatihi sihumo kahyrizikbarēta.

<sup>11</sup> Katuky humo Erodião humo kahyrizikbarēta. Naresiso wahoro ezektsa humo niwatihi asaktsa Sesus tuktsa sihumo kahyrizikbarēta.

<sup>12</sup> Myzawy Tiripaena, Tiriposa kino niwatihi asiza Sesus Kiristu tsyhyryze tarabaja ziknakaranaha asiza humo kahyrizikbarēta. Myzawy Periside kaharereziuwu atatsa humo kamypokzitsiarēta atatsa humo kahyrizikbarēta, atatsa hi Sesus tsyhyryze tarabaja ziknakara.

<sup>13</sup> Hupo atahi Kiristu ziwatawy ihumo tsipunihikrēta hỹ. Ije humo niwatihi, sihumo kahyrizikbarēta. Atatsahi ziksapywyky itse wata icyzik kasopyk.

<sup>14</sup> Asīkiritō, Perekōte, Eremes, Patorobas, Eremes, iwatsa mytukytsa situk niwatihi sizubarētsa humo kahyrizikbarēta.

<sup>15</sup> Piroroko, Suria, Nereu izawy Orīpas iwatsa Kiristu tyryktsa situk sizubarētsa humo kahyrizikbarēta.

<sup>16</sup> Kytsa ahahumo ahamypokzitsiukrētsa tsimymy-watawynaha iwatsahi tuharapeharapyryknahaktsa. Sizubarētsa Sesus tuktsa nanabyitaba asahi mozumubanaha Deus harere piwabykynaha, asaktsa ahahumo sihyrizikbarētsa hỹ.

*Asiba nepyk kapehawu bo wabytoktotahaktsa.*

<sup>17</sup> Iwaze katukytsa kapehawu bo tsiwabytoktonahaktsa! Asaktsa myharape sakbyrikinahatsa ihumo ahasopykzi-uhu! Hawa botu tsinymyrynaha anahi pimyi tsihikik-naha. Pahaknikinaha. Sibara botu tahaktsa! <sup>18</sup> Asaktsa

hawa Kiristu mozihihikik batu hỹ zikaha. Taha bo zuba sisopyk. Asahi:

— Myharere baba. Hawa wasani ana tihi tsimykaranaha — iwa mybarapetu mykaranaha. Kytsa sispirikpobyitsa tu mysisapybyikinaha iwatsahi sihumo paikpa mytsaty mykaranaha.

<sup>19</sup> Ikiahatsa humo kakurēta hỹ. Kytsa sizubarētsa nanabyitaba ahasoho piwabykynaha hawa Sesus Kiristu harere bo zuba hyỹ tsimykaranaha iwatsahi ihumo ahaspirikporētsa tsimoziknaha ana hi ziwabynaha. Iwatsahi isapyrēnikia ty zuba tahaktsa kytsa! Imysapybaraka tsimoeuwaiknaha. <sup>20</sup> Deus ba hawa tohi zizukninaha iwaze Satanas zikwy myzipapykik iwaze ba zahayknizo iwatsahi ikiahatsa Satanas bo ka mytsaty mytsaty byitahaktsa! Iwaze Deus bo ahatsyhyryze ikpamykysoko:

— O Deus myzo tysisapywykykta! — mykara.

<sup>21</sup> Katukta Timoteo ahahumo tsihyrizikbarēta. Katuk tarabaja mynakara. Mytukytsa Rusio, Sasō, Sosipataio iwatsa ahahumo sihyrizikbarētsa.

<sup>22</sup> Uta Terisio amy ty Pauro motsasoko anahi papeu humo piwatahaka, uta kino niwatihi ahahumo kahyrizikbarēta, katsaktsa Sesus harere bo hyỹ tsimykaranaha iwatsahi ihumo myspirikporētsa iwatahi ahahumo kahyrizikbarēta.

<sup>23-24</sup> Kaijo ahahumo tsihyrizikbarēta. Uta Pauro iwahoro eze ikapykyryk. Anaeze Sesus tuktsa mozumubanaha asa kino niwatihi ahahumo sihyrizikbarētsa. Erasto ahahumo tsihyrizikbarēta, Korītio ezektsa atakta okyrysaro perykytsa. Mytsy Kuarato niwatihi ahahumo tsihyrizikbarēta.

*Deus bo tsimysakibaziknahaktsa.*

<sup>25</sup> O kytsa Deus bo tsimysakibaziknahaktsa! Katsaktsa:

— O Deus ikia zuba apunihikrēnikita hỹ. Ikia zuba amysapyrēnikita hỹ — tsimahaktsa! Atahi tisokpykziurēta hỹ. Ata humo hi mypunihikrētsa tsimoziknaha, katsaktsa Sesus harere bo hyỹ tsimykaranaha izikwy humo tsikspirikpotohinaha. Deus wasania ty hawa Sesus kytsa Deus bo mysioktyhyryk motsasoikik. Kytsa sizubarētsa bo ana harere nitsasoko. Tubabatu anaharere mybarawy ezektsa bo tsihokdaharēna. Abaka batu ihokdaha. <sup>26</sup> Deus harere mybarawy ezektsa sizubarētsa bo motsasoko, kytsa mysipeha wasania ty motsasokonaha iwaze asa kino niwatihi Deus harere bo hyỹ mykaranaha, iwatsahi ihumo sispirikporētsa moziknaha. Deus koikny baktatu isohowy humo iwa iharere papeu humo tapara tu ziwatahakanaha aba kino atsatu mykara.

<sup>27</sup> Iwatsahi Deus bo tsimysakibaziknahaktsa kytsa!

— O Deus myzo ikia tsahyrinymyrēta babata ahyrinymyrywy wasani hỹ ikia zuba asopykziurēta hỹ iwatsahi aharere bo hyỹ tsimaha. Ikia hi Sesus Kiristu katsa mybo tsikzipaha iwatahi inasik iwatsahi atuk mywahi tsimynapykyryknaha. Ikia humo zuba mykurētsa tsimynapykyryknaha — tsimaha.

Iwa tsimytsasonahaktsa kytsa hỹ. Niwazuba.

Pauro

## **Deus Harere Aibaky Sesus mymyspirikpoko naha New Testament in Rikbaktsa (BR:rkb:Rikbaktsa)**

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

### **Copyright Information**

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

